

萬有文庫

第二集七百七種

王雲五主編

元詩紀事

(三)

陳衍輯

商務印書館發行



元 詩 紀 事

(三)

陳 衍 輯

國 學 基 本 叢 書

# 元詩紀事卷十四

丁復

復字仲容。天台人。延祐初游京師。與楊載、范梈同薦入館閣。不果。有檜亭稿。

李孝光檜亭集跋。至建業。見仲容已五十餘。其詩皆已絕去生穉操。蹙精悍。猶之宛馬不蹏不齧。不蹏而日行千里。既老買宅建業之城北。南戶故有兩檜樹。醉依樹而吟哦。因自名其什曰雙檜亭詩云。

李桓檜亭詩藁序。地既深僻。有園亭之勝。古檜列植左右。客至款坐亭上。壻饒介之。方集君詩。得若干首。爲一編。精麗奇偉。格超而趣遠。余識君於二十年之前。當是時。君詩酷類太白。雜而實之。集中見者。不復能辨。今其體稍變。將自爲一家。楊翻檜亭續集序。詩必因酒而作。引觴揮毫。若不經意。而語率高絕。飲至半酣。詩愈益奇。而先生亦頽然醉矣。然往往卽書卷上。未嘗起草。故詩雖多。藁皆不存。

夏日過龍翔寺養蒙室空閒琦元朴書記因讀鄭明德詩就韻奉贈

新竹滿牆。雨西隣留老翁。上人虎邱虎。作客龍河龍。及室每愛玉樹好。住屋少隔銀杏東。日不得見夜作夢。時一過之。但恐空百年。共秋草。兩閒同轉蓬。昨日之日我髮亦已白。明日之日子顏寧復紅。衆皆上我

固下。宗石胡盧誰售價。花綠樹茂煖爲冬。葉爲松高寒入夏。南風西來卽是秋。高歌且爾鏘鳴球。一蝸舉世兩鬥國。六鼈何處三山洲。須君芥發白毫相。放我江湖之客舟。我年五十九知命。我自信之誰與證。君今語我我卽聞。我且語君君乃聽。僦屋得園一畝耕。煮菜作羹全無成。何如寧戚扣牛角。長歌夜夜追天明。

草堂雅集。李五峯題此詩云。初讀新竹滿牆雨。意謂類馮海粟。及讀至一蝸舉世兩鬥國。六鼈何處三山洲。大以爲好。老賊胡不死。

題程先生西行集。程年七十餘。歸蜀改葬父母。

峽東水如箭。巴行船上天。亂離藁葬後。衰老秭歸地名邊。手把西行集。心追北上年。東風故山淚。落日灑江煙。

檜亭集自注。大德丙午早。明年浙東饑。僕因北上。茲有感焉。

九月一日遊昭亭在宣州

山色江光帶近郊。道旁楊柳舞寒條。半生九日黃花酒。多在口口白下橋。千里客遊仍暮景。疑鄉人事又今朝。老來未遣登臨嬾。盡醉東家綠玉瓢。

詩藪全篇整麗。首尾勻和。

醉歌贈雲心子陸華之

雲心子陸農師之子孫。老來賣卜錢唐門。搜元扶微擊混淪。進退五緯扶兩輪。皞父及芒兒。束手就律呂。

不敢差毫分。前身定是張博望。老樹倒騎上崑崙。投杼機上女。飲牛河畔人。與之細說天地根。卻來人世三千歲。君平朽骨呼不聞。功名富貴無足云。祇談禍福開盲昏。得錢沽酒和天吞。赤城有狂客。十年江海看浪翻。歸來黃塵中。拭目驚見君。抵掌一長笑。各拂頭上巾。別時綠髮滴可染。祇今雪繭纒吳盆。少者忽已老。老者不復存。政須日日醉倒湖邊尊。尊已倒。還可酤。不愁黃金盡。但恐清且無。舉手招羲和。低頭喚天吳。勸爾勿東逝。止爾勿西徂。西徂不可止。東逝無時已。囑付酒家兒。明當復來此。

西湖志餘。元時陸華之。饒唐人以賣卜馳名。且通文學。縉紳多與之友。天台丁仲容贈之歌云云。  
應夢一作文虎

夢虎。字彥文。黃巖人。

梅魂

禹廟歸來骨已靈。風林月落見靈形。玉龍一曲香隨返。彩鳳三招夢未醒。弔影西湖雲樹黑。斂妝東閣土花馨。莫誇賦客心如鐵。楚些淒酸可忍聽。

浙江通志。嘗游京師。賦梅魂詩。虞集楊載見之。亟加歎賞。稱爲應梅魂。黃潛薦之不起。人高其行。  
干文傳

文傳。字壽道。號止齋。平江吳人。中延祐會試乙科。官至禮部尙書。有仁里漫藁。

題水村圖

桑梓未能忘楚甸。吾書久已寄吳門。悠悠江海風煙隔。知是夕陽何處村。詳錢仲鼎下

洪震老

震老字復翁淳安人延祐中領鄉薦官州學正學者稱石峯先生

句

通都大邑人爭馳一泉一石小亦奇雲深路絕無人處縱有佳山誰得知

升庵詩話元遺山北嶽詩東州死愛華不注向在陋邦何足數敬亭不著謝宣城斷岸何緣比天姥言山水在通都易得名也洪震老元人淳安東泉山詩云言山人在僻遠人不知也二詩意絕相類亦名言也

辛鈞

鈞字口口東平路人延祐間知單州官至嶺南廣西道肅政廉訪使

遺直軒詩

一家兄弟兩詩仙同在蠻邦豈偶然今日開軒見遺像當時美政亦相聯

山堂肆考遺直軒在雷州西湖近蘇公樓元辛鈞詩云云

陳釋會

釋會字伯敷口口人官國子助教

案元史列傳云處州人而靜春堂詩集後序自稱吳興陳釋會

句

處士近來恩例別。麻鞋一對當蒲輪。

山居新話因話錄云。昔有德音。搜訪懷才抱器不求聞達者。有人逢一諸生。奔馳入京。問求何事。答曰。將應不求聞達科。因念延祐間陳伯敷。釋會到都。每見晦跡邱園者。數多奔競。遂有云云之譏。

韓信同

信同。字古遺。寧德人。延祐四年。應鄉舉不合。歸。

題岳王墓

妖星墜地芒角赤。劍龍悲吼國蕭瑟。中原王氣挽不回。將軍一死如毛擲。秦家小兒真戲劇。播弄造化搖樞極。指讎爲親忠且逆。隻手上遮天眼碧。九重茫茫隔天日。無由下燭臣愚直。臣愚萬死不足惜。國恥未湔猶憤激。古墳埋冤血空灑。風雨年年土花蝕。我恐精忠埋不得。白日英魂土中泣。請將衰骨斲出荒苔痕。獻作吾王補天石。

筆精古今題岳王墓者多矣。元季韓古遺一篇。岳集未收。差有溫李之調。詩云云。

汪澤民

澤民。字叔志。婺源人。登延祐戊午進士第。官至禮部尚書。致仕。長槍賊起。被執不屈。死諡文節。有宛陵遺集。

罵賊

江城欲破竟何爲。獨有孤臣謹自持。罵賊肯教雙膝屈。忠臣不顧一身危。

元詩選長槍賊攻寧國城陷被執大罵不屈爲詩云云遂遇害。

句

及瓜當此日行李似來時。

梧溪集嘗推官平江任法恕允獄多平反垂代題春帖云云迨今爲實錄。

吳萊

萊字立夫浦陽人延祐七年有司以春秋薦下第後薦爲書院山長未行卒私諡淵穎先生有淵穎集。

淵穎集附錄宋濂撰碑文初盛夫人懷娠始七月翰林公夢西域神人飛空而來直止夫人之寢。絳翼日先生遂生因名曰來七歲巖南先生方公鳳見而奇之曰此邦家材也取南山有臺詩中語更今名。

宋學士集東經齊魯梁楚之郊北抵燕每遇中原奇絕處昔人歌舞戰爭之地貫酒高歌自謂綽有司馬子長遺風游海東洲歷蛟門峽過小白華山登盤陀石著觀日賦以見志至元六年先生年四十四棲遲衽席忽夢作童汪躋贊覺謂人曰汪躋躋者也今歲殆不起耶竟卒於家當其賦詠捷如風雨一日於故人家見几上堆剡紙數十番戲爲長歌頃刻而盡對嚴巧文采緜麗觀者驚以爲神。



浦陽人物記。族父幼敏。家多書。私取讀之。幼敏竊窺。漢書也。指谷永杜鄴傳。謂曰。能誦貸汝。罰立夫琅然誦之。三易他編。皆如初。方鳳見而歎曰。汝南應世。叔不是過也。晚自號深裏山道人。人因稱深裏先生。

淵穎先生集。胡翰序。其擬論日本書。蓋其十八時所作也。人謂其有終軍王褒之風。

林泉隨筆。吳立夫論倭書。規模倣司馬相如論蜀文。其末所述論其王之言。雖古之辨士。莫能過也。其他大游觀日兩賦。與夫形釋秦誓論。補牛尾歇辭等篇。皆雄深卓絕。

詩藪。吳立夫學杜。大篇氣骨可觀。而多奇僻字。

#### 西域種羊皮書褥歌寄李仲羽

波斯谷中神夜語。波斯牧羊俱雜虜。當道刺刀羊可食。土城留種羊脛骨。四圍築場聞杵聲。羊子還從脛骨生。青草叢抽臍木斷。馬蹄踏鐵繞垣行。羊子跳踉卻在草。鼠王如拳不同老。飲肉筵開塞饌肥。裁皮褥作書林寶。南州俠客遇西人。昔得手褥今無倫。君不見冰蠶之錦。欲盈尺康洽年來貧不貧。

樂郊私語。楚石大師爲沙門尊宿。嘗從上都。有漠北懷古諸作。余嘗讀其自言羊可種。不信繭成絲之句。疑以爲羊可種乎。因以問師。師曰。大漠迤西。俗能種羊。凡屠羊。用其皮肉。惟留骨。以初冬未日。埋着地中。至春陽季。月上未日。爲吹笳呪語。有子羊從土中出。凡埋背一具。可得羊數隻。此蓋四生胎外之化也。亦不足怪。特非中國所有。致生疑耳。後讀浦江吳立夫西域種羊皮書褥歌云云。此又云以脛骨種之。與琦師目見之者不同也。蓋波斯國別有種法。如吳詩所云耳。

題趙大年林塘秋晚圖

老景青黃筆底收。晴鳧冷雁共汀洲。王孫畫學空花竹。不到銅駝陌上秋。

筆精。元吳淵穎題趙大年林塘秋晚圖云云。譏刺之意微而婉矣。

夕泛海東尋梅岑山觀音大士洞。遂登盤陀石。望日出處及東霍山。迴過翁浦。問徐偃王舊城。八首。山月出天末。水風生晚寒。扁舟劃然往。萬頃相渺漫。星河白搖撼。島嶼青屈盤。遠應壺嶠接。深已雲夢吞。蟠木繫予纜。扶桑纓我冠。寸心役兩目。少試鯨魚竿。

起尋千步沙。穹石塞行路。怒濤所攙擊。徒以頑險故。卓哉梅子真。與世良不遇。上書空雪衣。燒藥迺煙樹。玄螭時側行。縞鶴一迴顧。從之招羨門。滄海晝多霧。

茫茫瀛海間。海岸此孤絕。飛泉亂垂纓。險洞森削鐵。天香固遙聞。梵相俄一瞥。魚龍互圍繞。仙鬼驚變滅。舟航來旅游。鐘磬聚禪悅。笑然小白花。秋翎落如雪。

長嘯山石裂。我今在東溟。遊日出重微。褰衣窮絕陁。奇氛抱珥赤。遠影摩空青。想像陽谷水。徘徊爛龍形。晨昏相經絡。稚耄不得寧。豈若柯斧爛。看棋了千齡。

遙觀杏無梅。宛與東霍鄰。悲夫童男女。去作魚鼈民。紵嶼尙餘聚。蓬山寧爾神。古棹苔駐跡。仙枰竹祛塵。知謁徒爲拂。飛槎邈難親。好攜支機石。去躍織女津。

笑揮百川流。更赴無底壑。青天分林邊。白浪屹爲郭。卉裳或時采。椎髻亦不惡。投珠鮫人泣。淬劍龍子愕。海宮眩鱗縷。商舶豐貝錯。盍不呼巨鵬。因風泝寥廓。

老篙週我舟。沙壤晚煙起。蒼茫魚鹽場。寂歷鼓吹里。人民悲舊王。歲月記遺趾。終捐玉几研。不揀朱弓矢。東西八駿馬。今古萬螻蟻。此事如或然。須瀟會稽水。我行半天下。始到東海隅。水落焦石出。中飛兩鶻鷂。情知瓊奇產。勢與險阻俱。在夷豈必陋。雖聖猶乘桴。吭風丹穴鳳。尾雨青丘狐。幸隨任公子。不愧七尺軀。

王邦采箋本淵穎集。按先生甬東記。梅岑山。梅子真煉藥處。山梵書所謂補怛洛迦山也。唐言小白花山。自山東行。西折爲觀音洞。洞瞰海外。巉中裂。大石壁紫黑。旁罅而兩歧。亂石如斷圭。積伏蟠結。怒潮攪擊。晝夜作魚龍嘯吼聲。又西則爲善財洞。峭石嚙足。泉流滲滴。懸纓不斷。前入海數百步。有巘。土人云。曾有老僧秉燭行洞穴。且半里。山石合一竅。有光大如盤盂。側首睨之。寬弘潔白。非水非土。遠不辨涯際。又自山北。得盤陀石山。巖怪益高。疊石如埤。東望宵窅。想像高麗日本界。如在雲霧蒼莽中。日初出。大如米筴。海盡赤。跳踊出天末。六合翕然鮮明。及日光照海。薄雲掩蔽。空水弄影。恍類鋪僧伽黎衣。或現或滅。南望桃花馬秦諸山。嵌空刻露。屹立巨浸。如世疊太湖。靈壁不著寸土尺樹。天然可愛。東南望東霍山。山多大樹。徐市蓋駐舟此。又有沙山。細沙所積。海日照之有芒。手攬則霏屑下。漸成窪穴。潮過又補。終不少損。旁有石龍。蒼白角爪。鱗鬣具。蜿蜒跨空。亘三十里。舟徑其下。西轉別爲洋山。中多大魚。又北則爲胸山。岱山。石蘭山。魚鹽者所聚。又自北而南。則爲徐偃王戰洋。世言偃王旣敗。不之彭城而之越。棄玉几。硯會稽之水。望馬秦桃花諸山。羨門安期生隱處。

此去何可極。中心忽傷悲。亂山插滄海。千疊壯且奇。信哉神仙宅。而養雲霧姿。鋼鋏鬼斧舐。刮濯龍湫移。坎窞森立劍。槎枒割靈旗。微涵赤岸水。暗產瓊田芝。老生今安在。方士不我欺。經過燕齊靡。出沒楚漢危。挾山作書鎮。分海爲硯池。殘花錦石爛。淡墨珠巖披。東溟地涵蓄。北極天幹維。玉鳥投已遠。桑田變難期。誓追凌波步。行折拂日枝。羽丘杳如夢。玄圃深更疑。豈無抱朴子。去我迺若遺。空餘煉藥鼎。尙有樵人知。王邦采箋本。淵穎集。按甬東記。盤陀石山。南望桃花馬秦諸山。嵌空刻露。屹立巨浸。如世壘太湖。靈壁不著寸土尺樹。天然可愛。定海縣志。安期先生祠。在昌國在馬秦山。舊傳安期生隱此。其鄉亦名安期鄉。桃花山解。見次定海候濤山。

句

塵飛馳馬埒。雪擁讀書甍。

詩藪元五言律可摘者。吳立夫云云。

張翔

翔字雄飛。西河人。官湖南廉訪使僉事。

至正集。張雄飛詩集序。延祐首科。列右榜者十六人。唐兀氏張君雄飛。右榜有聞者也。尤工於詩。往往膾炙人口。佳章奇句。不可悉舉。僉浙東憲。過錢唐。登會稽。探禹穴。天台。雁蕩之勝。舉在心目。得江山之助。故其詩益昌而奇也。移僉湖南。過余琅琊山中。出其稿古律詩若干首。屬序其端。

岳陽樓

樓上元龍氣不除。湖中范蠡意何如。西風萬里一黃鵠。秋水半江雙白魚。鼓瑟至今悲二女。沈沙何處弔三閭。朗吟仙子無人識。騎鶴吹簫下碧虛。

升庵詩話。余昔過岳陽樓。見一詩云。視其姓名。則元人張翥字雄飛。不知何地人也。雄飛在元。不著詩名。然此詩實可傳。同時虞伯生。范德機。皆有岳陽樓詩。遠不及也。

呂權

權字子義。婺之永康人。

句

青壁雖萬里。白雲只三尋。

黃文獻集。天歷二年。卒於家。得年三十有八。始君自書其夢中之語云云。莫知何義。至是以其年之修短驗之。若有數然。

韓性

性字明善。紹興人。延祐中。憲府舉爲慈湖書院山長。受而不赴。後卒。賜諡莊節先生。有五雲漫稿。

句

月上影娥池。人在衆香國。

貞居詞。王載隱五香圖。作圓象。墨寫梅蘭水仙山礬瑞香五品。盤屈折枝於其中。韓明善有云云。一聯。

劉子郁

子郁字□□。□□人。延祐五年。官武鄉縣尹。

奉陪憲副王公謁靈潤祠

緩轡乘驄轉翠巔。偶陪憲使到龍泉。蒼松老檜參天色。碧瓦朱甍耀日鮮。救早有靈皆樂歲。爲霖無地不豐年。爐煙禮罷香猶在。賦就新詩萬古傳。

許有壬跋。憲副長安王公。按行武鄉。聞靈潤祠雨旱有孚。且見其岡陵秀拔。林木叢茂。偕邑令劉子郁一至焉。有詩記其游。篇終意在子郁士者石贊等。將刻諸石。以爲神宇觀美。介王希明來請敘。噫。此非欲以嚴于神而敬于上乎。發剔其休。使見之者有所欲。其事神也嚴矣。鐫刻英辭。使傳之者有所息。其事上也敬矣。世之覽者。必知之爾。余獨謂有大于是者焉。司憲之于郡邑。有不承者。則檟楚督責。以作其怠。有善治者。則誘掖鼓舞。以盡其才。王公明以勇濟。剛以柔通。持憲之正者也。其發之翰墨者。余知其意不在神。而有取于令之賢也。取令之賢。所以誘掖鼓舞。俾進于後也。其不在彼而在此。昭昭矣。余又願令之益勉于治也矣。令乎。其必有以副之矣。若夫山川梗概。則已見於詩。此在所略。延祐戊午五月二十日。遼倅許有壬識。

趙雍

雍字仲穆。孟頫仲子。以蔭守昌國海寧二州。官至翰林院待制。

古詩

西風聲蕭蕭。愁來如夢寐。鄉關萬里遙。兄弟何時會。遲此相見期。真以日爲歲。別來經八霜。朱顏久憔悴。人生宇宙間。名利何足計。何如擊中鶴。翱翔隨所至。

又

我居水精宮。遠游來朔方。離家近十載。兄弟遙相望。始見世情薄。紛紛名利場。富貴不可期。人生難付量。乾坤本無私。江山歎興亡。蟬聲噪落日。露草啼寒螿。明月如有情。照我肝與腸。西風動林末。蕭然秋意涼。回首歲云暮。信美非吾鄉。展轉復展轉。愁多知夜長。

思歸

嫋嫋秋風動。客懷啾啾猿鶴苦。相催魯侯不遇關。天意臧氏焉能沮。我才萬里驅馳離鄉國。十年奔走在塵埃。吳興山水何清遠。一棹扁舟歸去來。

趙待制遺稿。延祐六年春正月。寄呈德璉姊丈一觀。冀改抹幸甚。書於大都咸宜里之寓舍。趙雍。又文徵明跋。楷行閒作。轉益妍美。德璉姊丈。蓋魏公長倩王國器也。國器長於今樂府。楊鐵崖亟稱之。故此卷所書樂府爲多。豈因其所好耶。

又許初跋。所書豔詞特多。或偶興爾。閒如古詩二篇。思歸一律。頗以孤忠自許。紛華是薄。而興亡骨肉之感。默寓其中。意其父子之仕當時。亦有不得已者。良可悲已。

葉森

森。字景修。錢塘人。早從貞白先生游。後登趙松雪之門。

題陳涓叟紫雲編

一度詩來一見君。只應芳杜襲蘭薰。有時寫到游仙句。繞筆秋香生紫雲。

西湖志餘。陳涓叟賦詩。有天然趣。隱居葛溪上。歲一來杭城中。名人勝士。爭要致之。惟恐其去也。所著有紫雲編。葉森爲之類集。復題詩云云。

鄭采

采。字季亮。溫之平陽人。

題復古秋山對月圖

天窺窺兮月。鵬翮山。齟齬兮水。繚繚木。森森兮竹。籊籊勢。瀟瀟兮墨。鱗鱗

清河書畫舫。題語甚奇。走筆錄之。

鄭禧

禧。字天趣。永嘉人。進士官黃巖州同知。

悼亡吟二首

特寫青箋。幾往來。佳人何自苦憐才。傷心春與花俱盡。啼殺流鶯喚不回。

相見愁無奈。相思自有緣。死生俱夢幻。來往只詩篇。玉珮驚沈水。瑤琴愴斷弦。傷心數行淚。盡日落花前。

春夢錄。城之西有吳氏女。才色俱麗。其父早世。治命宜以爲儒家室。余今年客于洪府。一日媒姬來言。女家久擇壻。難其人。洪仲明公子戲欲與余求之。余辭云已娶。媒姬欲求余詩詞。達于女氏。



余戲賦木蘭花慢一闋。一日女和前詞。附媒姬至。乃曰。吳氏之族。見此詞喜。稱文士之美。但母氏謂官人已娶而不可。然女獨廣唱迭和。意欲雖居二室。亦不辭也。有周氏子。挾財以媚母氏。母遂納其定禮。女號泣曰。父臨終命歸儒生。周子不學無術。但能琵琶耳。我誓不往周氏。因佯狂擲冠於地。母怒歐之。女發憤成疾。病且篤。母乃大悔。然女病竟無起色。未幾卒。今具錄往來詞翰於後。覽者亦必昭余之悽愴也。延祐戊午。永嘉鄭禧天趣序。丁巳歲二月廿六日。余寄木蘭花慢云云。三月一日賦詩三首云云。吳氏和云云。吳氏既終。余悼亡吟云云。

黃敏

敏字子侑。

悼吳氏

春樓珠箔捲東風。幾度偷彈淚粉紅。豔質豈期黃壤隔。香魂應逐綵雲空。解將遺事留身後。盡忘前言在耳中。杏蕊梅花俱一夢。悠悠深恨鎖幽宮。

汪子才

子才字庭材。

悼吳氏

犀心兔穎屢通津。未識嫦娥一面新。興盡故園梅已謝。情留別塢杏初春。將身輕許志雖失。在耳不忘言可遵。生死幽冥千古恨。臨風披閱爲傷情。

徐天寶

天寶字子文。

和黃韻

杏花初破怯春風。未識芳心一點紅。詞翰往來傳意密。死生夢幻轉頭空。素知分淺鴛鴦裏。預許名題雁塔中。杳杳幽魂何處覓。真華消息報仙宮。

沈君清

和黃韻

落花一掃夜來風。枉駕相思寄斷紅。梅信日聞魚水遠。杏香還逐燕泥空。情懷琴瑟千春恨。怨入琵琶一夢中。門掩滿庭詩思遠。令人惆悵館娃宮。

春夢錄。吳氏既終。友人共閱此女詞情事迹。可傷。作詩悼之。黃子侑敏云云。汪庭材子才云云。徐子文天寶和黃韻云云。先生沈君清和黃韻云云。案餘詳鄭臚下。

胡炳文

炳文字仲虎。婺源人。官蘭溪學正。

拜岳鄂王墓

有公無此日。再拜淚交頤。大義君臣重。孤忠天地知。鳩毛何太毒。龍渡只如斯。墳畔休留檜。行人欲斧之。明休寧汪循後序。先生所學之大概。行己之大節。平生不可以告人者。偶于此洩焉。而不自覺。

句

舉頭山蒼然。一峯立雲表。

雲峯集附錄行狀。所居之南。一峯高聳。有詩云云。故鄉人號曰雲峯。學者因稱爲雲峯先生。元統元年癸酉。先生忽夜夢峯頽。旦。先生曰。吾壽終矣。不二日。竟以微疾奄逝。

宋本

本字誠夫。大都人。至治元年。爲廷試第一人。賜進士及第。官至國子祭酒。諡正獻。有至治集。西湖竹枝集。弟娶。泰定甲子登第。時比之宋二宋云。

船上謠送伯庸以番貨事奉使閩浙

舊時家近黑橋街。三十餘年不往來。憑仗使君一問訊。楊梅銀杏幾回開。

元文類原注。余以至元廿六年出杭。故居東廂隅四條巷。旁有橋名黑橋。居有楊梅銀杏二樹。在巨井上園。

案此詩。楊鐵崖以入西湖竹枝詞。尙有一首在前云。湧金門外是西湖。隄上垂楊盡姓蘇。作得吳趨阿誰唱。小卿墳上露蘭枯。

大都雜詩四首

拋卻漁竿滄海邊。拂衣來看九重天。畫闌九陌橋如月。綠影千門樹似煙。南國佳人王幼玉。公朝才子杜樊川。紫雲樓上如澠酒。孤負東風二十年。

繡錯繁華徧九衢。上林詞賦漢西都。朱門細婢金條脫。紫禁材官玉鹿盧。萬里星辰關上界。四朝冠蓋翊  
皇圖。東鄰白面生紈綺。笑殺楊雄臥一區。  
盧溝曉月墮蒼煙。十二門開日色鮮。海上神仙非弱水。人間平地有鈞天。寶幢珠珞瞿曇寺。豪竹哀絲玳  
瑁筵。春雨如膏三萬里。盡將嵩呼祝堯年。  
形勢全燕擁地靈。梯航萬國走王城。狗屠已仕明天子。牛相寧知別太平。玄武鉤陳騰王氣。白麟赤雁入  
新聲。近來朝報多如雨。不見河南召賈生。

詩藪全篇整麗首尾勻和

吳師道

師道字正傳。婺州蘭溪人。登至治元年進士第。官至禮部郎中。有禮部集。

集句贈潘季通

江上春風送客舟。鳥啼花落水空流。勸君更盡一杯酒。與爾同消萬古愁。

月山詩話。元吳師道集句勸君云云。極工。明安公石集句亦以二語爲對。當是偶同耳。

揚州四首錄一

富貴驕奢志已迷。無端更欲上青梯。庭前木鶴真兒戲。況說雲中犬與雞。

禮部集自注。腰纏十萬貫。騎鶴上揚州。昔人以爲戲言。譏兼得之惑。蓋誠有是事也。劉安高駢是已。

十臺懷古井序

友人自杭來。示及濟南王十臺懷古詩。讀之感慨不已。夫江山故宮。歌舞遺跡。千載之上。英雄游焉。千載之下。狐兔行焉。俛仰廢興。孰能無情。而詩人尤甚。發爲咏歌。詞雖不同。而意總合。若物之鳴。以類而應。余安得忘言哉。余生好遊。嘗聞司馬子長。杜拾遺。覽觀四方山川之勝。以壯其文。心竊慕之。異時浮江淮。泝湘沅。上巴峽。過秦漢故都。壓燕趙齊魯之陽。所見如十臺尙多。訪遺老。詢故實。足以發一時之興。快宿昔之願。歸而讀馬杜之詩文。以證其所得焉耳。

姑蘇臺

百花洲上姑蘇臺。吳王宴時花正開。半空畫燭西子醉。三更鐵甲東門來。吳波渺渺吳山簇。不見嬌嚬倚闌曲。丹楓落月怨啼鳥。碧草東風驚走鹿。闔閭丘墓相連處。應恨夫差迷不悟。斷指千年血未乾。游魂夜哭臺前路。

章華臺

靈王傾國崇臺宇。按劍章華睨中土。弁裳伏地走諸侯。鐘鼓凌空震三楚。騁驕不畏伍子謀。落成乞與吳兵游。孤舟竟走江上路。塊土獨枕山中愁。十年伯氣終蕭索。回首華容歸不得。飢魂漂泊啼秋煙。細腰卻舞新王前。

朝陽臺

神娥縹緲高唐上。楚宮樓閣森相向。丹楓蒼桂湧孤闕。錦石清江簇連嶂。行雲漠漠一作冥冥飛雨寒。狐

猿咽咽秋花間。翠旂龍駕杳何處。斷魂殘夢愁空山。微臣宋玉詩能賦。當日襄王豈真遇。千古秋風恨未平。高泉飛落三巴怒。

黃金臺

昭王銳志移青社。築土懸金奉賢者。四方劍佩集強燕。千里風塵馳駿馬。郭君自舉先羣豪。樂生獨步超凡曹。酬恩一雪伯國恥。建功並倚雲天高。君臣意氣千年少。落日荒墟沒秋草。黃金買貴滿長安。惆悵英雄布衣老。

戲馬臺

項王戰馬從東來。意氣蹴踏全秦摧。入關不並沛公轡。還鄉卻上彭城臺。重瞳按劍風雲靡。萬匹騰空煙霧起。淒涼坡下泣名騅。零落江邊一作濱餘數騎。寄奴千載心爭雄。登高把酒臨秋風。詐移晉鼎非男子。君看百戰東城死。

詩藪雄渾流麗步驟中程

歌風臺

沛宮置酒君王歸。酒酣思慘風雲飛。兒童環臺和擊筑。父老滿坐同沾衣。一歌豐沛白日動。再歌淮楚長波湧。龍髯氣拂半空寒。虎士心馳四方勇。河山蕭瑟長陵荒。野中怒響猶飛揚。高臺未傾風未息。故鄉之恨那有極。

望思臺

桐人氣迫前星黯。思子宮成翠華晚。高臺有恨碧草新。大野無踪金犢遠。一朝弄兵兒罪輕。百年鍾愛天  
倫深。戾園魂魄夜寂寂。湖城風雨秋陰陰。漢宮樓觀連天起。方士熏香召仙鬼。望思望思終不歸。茂陵老  
淚如傾水。

銅雀臺

半空高棟翔金雀。玉展繡帷塵漠漠。西陵老樹暝色寒。建安殘妓春情薄。曲終紅袖辭尊前。簷傾斷甃飛  
人閒。分香老淚恨不滅。秋風吹入苔花斑。漢家一片當時土。肯爲奸雄載歌舞。銷盡曹瞞萬古魂。落日漳  
河咽寒雨。

鳳皇臺

金陵王氣飛祥雲。鳳皇臺上聲和鳴。鳳來春風花冥冥。鳳去秋風荒草生。嬌娥舞散高城暮。青山迴隔丹  
丘路。斜陽門巷語烏衣。細雨汀洲飛白鷺。江空天闊鳳影遙。謫仙吟誰誰能招。六朝宮闕煙蕭蕭。月明半  
夜人吹簫。

凌歊臺

大明天子游南國。紅粉三千臺百尺。歌鐘激浪楚日白。簾櫳凝樹湘雲碧。凌歊高宴金輿來。侍臣狎笑朱  
顏開。臺城宮扉鎖花柳。寄奴土障生塵埃。昏昏醉夢春風幾。不願江東數千里。酒能歌闌帝業銷。青山空  
映當塗水。

句

三月雲愁百里陰。大湖浪激三州白。大水 浙江亭遠亂帆飛。西興渡溟千花溼。觀潮 千年絕藝洪谷子。身在太行秋色裏。萬里雲飛木落時。遙寫欄干半空起。秋山圖 小槽新壓真珠酒。擊向碧桃花下吸。惟餘赤日並光輝。未許妖姬比顏色。紅玉杯 長天孤鳥沒。落日大江深。水夾徐邳去。河兼汴泗來。一掃苛秦法。重恢大漢風。飛雲浮甯棟。旭日麗高牙。懸空飛萬瀑。拔地立千峯。落花繁劍佩。高柳映帆檣。

詩藪正傳。五言古清新峭拔。一洗議論纖靡之習。第字句閒有離去者。較之當行。不甚合耳。七言古最長。十臺懷古詩。氣骨錚錚。時咸膾炙。其他句如大水各云。長篇如南城紀遊。修河道中等。作老筆縱橫。殊得工部敘事體。五言律如長天各云云。皆整麗有格。惜全首完善者稀。

又

庭下已生書帶草。馬頭初見米囊花。

吳禮部詩話。舊作集句。用東坡云云。對唐人云云。以爲的切。近閱張祐詩有云。碧抽書帶草。紅節米囊花。已有此句矣。

### 三寶柱

三寶柱。字廷珪。色目人。登至治元年。右榜進士第。

### 題門屏

逆刮蛟龍鱗。順捋虎豹尾。若將二伎論。尤比干人易。



輟耕錄。三寶柱頗以才學知名。雖湛於酒色。而能練達吏事。剛正有守。爲浙省郎中日。大書四句於門屏之上。云云。其意蓋以杜絕人之求請耳。

李好文

好文。字惟中。□□人。至治元年。登進士第。官至翰林學士承旨。

挽宋顯夫

四海人傳二宋名。玉京連占兩科榮。鄢陵初喜知公字。樂長終思送我行。故里經過人不在。遺孤問訊淚如傾。荒墳數尺西山下。一段平蕪綠又生。

自注。誠夫兄弟。阜慶中。嘗與先大人相遇鄢陵逆旅。始相知。至正乙酉。好文西行。顯夫賦長樂坡詩見送。乃絕筆也。故及之。

夏溥

溥。字大之。一字大充。號虎怕道人。淳安人。領至治三年鄉薦。爲安定書院山長。轉龍興路學教授。鴻門歌

大風揚兮赤雲屯。楚人望氣皆龍文。當時吾甚笑亞父。幸至彭城疽背死。誰云沐猴竟遭烹。汝乃盛怒哈孺子。嗟哉拔山之力不可得。扶義而西取天下者以三尺。君看項王重瞳舜重瞳。天命乃在隆準公。

吳山謠和鐵厓先生首唱

中興過江笑諸人。三十二表哀老臣。倡和國事可斬檜。馬上青衣竟何在。采石未靖瓜洲驚。戰功今乃歸

儒生第一峯前誰立馬。夜箭射血來帳下。

大雅集。鐵雅評曰。二作不用二李。別有一種史斷。

劉麟瑞

麟瑞字口口。號如邨。燠次子。

丞相信國文公天祥

金字牌飛出建章。鬱孤萬壘爲勤王。驅馳嶺海君臣寓。囚繫燕雲道路長。六籍一時光日月。孤忠萬里立網常。元歸凜凜渾生氣。南北人誇姓字香。

丞相陸公秀夫

八面兵威八面攻。馮夷飛血洗千篷。波翻水寨乾坤震。風仆檣旗社稷空。百辟散班奔鶴首。孤臣扈蹕憩龍宮。茫茫南國重回首。一片丹心照海紅。

樞密張公世傑

曾擁貔貅奏凱歌。匡山雲暝竟蹉跎。地空九有棲荒服。寨列千艘保海阿。龍躍靈沈天若此。烏鳴矧絕半如何。鯨波沃日炎光熄。凜凜英魂尙枕戈。

江東制置使謝公枋得

草履麻衣漫敝形。千年賣卜慣零丁。願從楚地師龔勝。欲向遼城友管寧。采石吟成期絕粒。娥碑讀罷棄餘齡。一門盡節均無媿。千載西山疊疊青。

符遂撰水邨先生傳子麟瑞哀死節之臣賦五十律題曰昭忠逸詠。

### 洪希文

希文字汝質莆田人郡庠聘爲訓導父德章字虎巖號吾圃有軒渠集希文有續軒渠集續軒渠集虎巖與坐萬山中朝晡孟飯燒芋咬菜相倡和無慍色吾圃試校游洋翁季枕邊談詩以僧敲未敢一言定烏過會安幾字來之句授之夜臥三鼓聞書聲云有子定知吾事足貧家頗覺此聲佳。

蘭陵詩話吾圃與子汝質並能詩汝質有名阿琦詩云我之先君子琦也爲大父丁卯鄉貢郎名字登天府又傅比館中觀咸淳丁卯榜帖詩云韓歐榜帖家聲舊孔孟詩書教澤新而郡志不載其父子名缺略者多矣。

### 句

佳句不隨飛鳥盡。名山可想屬僧多。題靈巖廣化寺沈香已帶寅前氣臘酒初聞子後香。守歲月明夜色玉連鎖露冷秋莖金屈卮。水仙術作賦重遊前赤壁。題詩一笑再玄都。夏政齋樞府再舉留莆郡鎮守功名不建頭顱老。日月如馳脾肉生。雪髯舊書餘草風搜遍好樹開花月送來。幽居淒其死者無歸路羞與讎人共戴天。官築城垣起衆墳石。

元詩選汝質集中警句如云云皆自成一家機軸。

### 陳植

植字慎獨。

自題畫

無多茅屋滄波遠。一半青山竹樹遮。宛似吾鄉荒寂地。直疑割我白鷗沙。

六研齋筆記。元陳慎獨名植。寫江浦樹石蒼莽疎宕。有子久氣韻。上書一絕云云。

孫鳳洲

贈歐陽圭齋

圭齋還是舊圭齋。不帶些兒官樣回。若使他人居二品。門前車馬鬧如雷。

綠雪亭雜言。長沙有朝士某者。還鄉意氣滿盆。賓至則鼓吹喧闐。里中有執友來謁之。朝士曰。翁素好誦詩。近日誦得何詩。執友曰。近誦得孫鳳洲贈歐陽圭齋之詩。甚有味。乃朗然誦之云云。朝士聞詩默然。明日賓至。門庭寂然。

傅子建

句

龜鼉滄海賦。龍馬赤文書。

吳淵穎先生集去歲留杭。德興傅子建夢得句云云。間以語予。及其鄉人董與幾。

# 元詩紀事卷十五

陳旅

旅字衆仲。莆田人。薦除國子助教。官至國子監丞。有安雅堂集。

山堂肆考。游京師。翰林侍講學士虞集見其所爲文。嘆曰。此所謂我老將休。付子斯文者矣。春明夢餘錄。元人董宇定杏花園。在上東門外。植杏千餘株。至順辛未。王用亨與華陰楊廷鎮。高安張質夫。莆陽陳衆仲。讌集。是日風氣清美。飛英時至。巾袖杯盤之上。皆有詩。虞集爲之記。

題虞先生詞後

憶昔奎章學士家。夜吹瓊管泛春霞。先生歸臥江南雨。誰爲掀簾看杏花。

蟬精雋。陳衆仲旅題虞邵菴伯生詩集後云云。蓋用虞邵菴風入松詞中事也。與張蛻巖仲舉詞。留意江南杏花春雨和淚在羅帕。意同。固邵菴之意也。

能守不成三五戒。

輟耕錄。陳衆仲先生嘗題樂全堂。有云云之句。人多不知所謂。按史記龜策傳云。天尙不全。故世爲屋不成三五而陳之。注。陳猶居也。

傅若金

若金字與礪。本字汝礪。新喻人。以薦佐使安南歸。除廣州文學教授。有清江集。

傅與礪詩集。胡行簡居敬序。渝舊錄袁山水最爲秀麗。近世范太史。傅廣文相繼以詩名於時。文章鉅公莫不推服。

詩藪。元人力矯宋弊。故五言律多草草。無復深造。虞楊開法王岑。而神骨乏。范揭時參章孟。而天韻疎。新喻晉陵二子。稍自振拔。雄渾悲壯。老杜遺風。有出四家上者。

奉題仇工部壁閒古松圖歌

蒼松在山自奇古。灌木翳之人不驚。忽然圖向堂上壁。滿坐嘆息長風生。交柯爛走森晝晦。其下將疑鬼神會。霧雨寒霏虎豹毛。雷霆怒折蛟龍背。乃知巨筆老且神。力斡造化雄千鈞。皇天不天棟梁具。后土潛回霜雪春。爾松已爲人愛惜。見爾爲爾生顏色。山中豈無材木倚。絕壁未逢匠石嗟。何益。傅與礪詩文集。虞公見之。題云。絕妙絕妙。吾人吾人。新來第一手。山是名勳京師。

題栖碧山爲淦襲舜咨賦

山人愛山如李白。幽棲還在碧雲深。松杉繞屋清宵響。雷雨縹崖白晝陰。石上每同仙客坐。花間猶恐世人尋。京華日日多塵土。終擬投簪話夙心。

傅與礪詩文集。揭文安公云。予欲賦栖碧久矣。輿無由起。一日臨江。傅與礪來。開卷同賦之。予詩未成。與礪已就。非不可更作。念無可以過與礪也。遂易結語而已。

卻侍姬連夕。擊遣侍姬。皆卽辭卻。我輩非陶穀輩人。不宜以此見。

夜宿安南天使館。主人供帳爛相輝。寶香爐起風過席。銀燭花偏月照幃。王母謾勞青鳥至。文簫先放綵鸞歸。書生自是心如鐵。莫遣行雲亂溼衣。

蘇天爵撰。傅與礪墓志。與礪受命行至安南。安南人多設譎詐以給使者。或郊迎張宴犒衆。或盛飾侍姬侑酒。君皆卻之。

### 悼亡

驚颿吹羅幙。明月照階屺。春草忽不芳。秋蘭亦同死。斯人蘊淑德。夙昔明詩禮。靈質奄獨化。孤魂將安止。迢迢湘西山。湛湛江中水。水深有時極。山高有時已。爰思何能齊。日月從此始。皇天平四時。白日一何遽。勤儉畢婚嫁。新人忽復故。衾裳欲遺襲。棺槨無完具。送葬出北門。徘徊但歸路。玉顏不可恃。況乃執與素。纍纍花下墳。鬱鬱塋西樹。他人亮同此。胡爲獨哀慕。新婚誓偕老。恩義永且深。旦暮爲夫婦。哀戚奄相尋。涼月燭西樓。悲風鳴北林。空帷奠巾櫛。中房虛織紵。辭章餘婉孌。琴瑟有餘音。瞻言瞻故物。惻愴內不任。豈無新人好。焉知諧我心。掩穴撫長暮。涕下霑衣襟。人生貴有別。室家各有宜。貧賤遠結婚。中心兩不移。前日良宴會。今爲死別離。親戚各在前。臨訣不成辭。傍人拭我淚。令我要裁悲。共盡固同理。誰能心勿思。

### 感獨

幽幽蕙草晚。靡靡蘭芳斷。皎皎夜泉人。冥冥不復旦。流塵棲暗壁。涼吹經虛幔。無論懽意消。日復愁思亂。魂傷夕方永。氣變秋將晏。當窗慘斷素。捐篋悲柔翰。憶初成好合。誓且同憂患。何言遂長終。獨處增永歎。

寤寢忽如在。展轉驚復散。念茲何嗟及。哀至聊自判。

百日

人生悲死別。矧在心相知。新婚未及久。杳杳遽何之。昔爲連理木。今爲斷腸枝。相去時幾何。百日奄在茲。虧月有圓夕。逝水無還期。棄置非人情。何以爲我思。

入室

粧閣閉長夜。幽闌坐復春。猶疑挑錦字。不見掩羅巾。故物空在目。蕭條生網塵。虛窗明月滿。芳砌綠苔滋。花閒時染翰。尙憶解題詩。寂寞幽泉下。貞心空自知。

追和蕙蘭

小窗開盡碧桃枝。憶得青鸞化去時。昨夜秋風妬幽怨。夢中吹斷素琴絲。江上愁時復值春。帶圍寬盡不宜身。階前舊種櫻桃樹。日暮飛花故著人。

輟耕錄。先生旣喪妻。哀戚之情。多見於詩云云。哀而不傷。得性情之正。是可傳也已。

憶內

湘臯煙草碧紛紛。淚灑東風憶細君。浪說嫦娥能入月。虛傳神女解爲雲。花陰晝坐閒金翦。竹裏春游冷翠裙。留得舊時殘錦在。傷心不忍讀迴文。

歸田詩話。荆公一日歸行。云賤貧奔走衣與食。百日奔走一日歸。生平歡意苦未盡。正欲老大相因依。空房蕭颯施繡帷。青燈半夜哭聲稀。音容想像知何處。地下相逢果是非。劉須溪云。此悼亡



作也。古無復悲如此者。傅汝礪憶內云。真致雖不及。而悽惋過之。

### 勤耕亭

日月糜閒暇。四序一作時更運之。斯人務作業。矧敢怠遑時。負耒適西疇。恆患耕作遲。仲春時雨至。羣物具含姿。牛食青澗阿。鳥鳴芳樹枝。興言播嘉穀。夙夜將耘耔。豈不懷逸居。亦念寒與飢。但使秋稅畢。聊樂及我私。羲農雖已遠。沮溺不吾欺。努力順天命。素餐非所知。

傅與礪詩文集。右詩爲鄒福作也。福。豐城田家子。事菽文揭先生。餘力能讀書。爲聲詩。又喜國語。習通其學。然朴慎不忘乎勤。先生甚喜之。嘗手書福自爲詩七首。敍其所從出京師爲文詞者。福多得其題述。是何福之能使人愛若是也。學者果皆繫所出乎。於是益知藝文爲有德矣。

### 壽陳景讓都事四十韻

八月十八日

種德由來遠。流芳信有苗。名門多令器。夫子最高標。地迴瞻崧岳。天清見斗杓。聲名從結髮。問學自垂髫。江漢栖遲久。林亭興致饒。紫蘭敷一作依月露。蒼竹倚風飄。畫艇移書放。秋燈把劍挑。微名寧屑屑。高志獨囂囂。五氣乘昌運。羣英集聖朝。武功收赫怒。文治付宣昭。歷數初歌禹。聰明已贊堯。求賢多晏食。夢帝起中宵。石室仍高隱。中臺歛見招。賜書縣日月。乘傳出雲宵。議論紆三顧。榮光一作名動百僚。入宮催護璽。趨府聽鳴鑣。郊社陳周禮。神人協舜韶。出關春衣繡。分陝夜乘輶。獬觸心彌壯。豺吞膽共銷。封章猶懇切。歸思遽飄飄。袞職江湖隔。鋒車道路遙。凝旒思穆穆。行李發蕭蕭。典祀尊原廟。承釐治大寮。步依文石進。香近黼裳飄。白日明驄馬。清霜急早鵬。帝裾遮道引。諫草避人燒。佐省持三尺。繩民究八條。兵曹乞暇

豫郎位益崇超。所向才華冠。何曾意氣驕。臺評推妙畫。士望慰深翹。引拔連茅茹。芬芳雜桂椒。銀章看且佩。金鼎竟須調。小草方慚出。浮萍久恨漂。文章殊豹隱。篆刻近蟲雕。徐穉矜縣榻。蘇秦惜敵貂。敢期充砥礪。猶幸致芻蕘。黃鵠追高舉。青松託後凋。火行占孟月。星聚識生朝。壽酒開雲液。仙音出鳳簫。祇應成遠業。未可慕松喬。

詩數風骨蒼然。多得老杜句格。

渾沌石行九江方叔高得武侯八陣壘中小石子其處白質而黃韋狀若雞子字曰小渾沌揭藝文  
爲作渾沌公傳云。

渾沌以來不可數。萬八千歲生盤古。網緼乃在卷石閒。光怪潛通落星渚。來從魚腹人盡訝。坐念武侯心獨苦。八陣圖成泣鬼神。三江石轉凋寒暑。蒼波噴漫圓且堅。雞子結成生理全。久當化鳥非爲怪。大未成羊亦可仙。玉精隱月相照射。金液流霞紛繞纏。輕清已判中黃外。元氣猶函太素前。英雄事往唯存石。天衡地軸今誰識。江上嘗疑霧雨寒。坐中歛恐風雷黑。摩挲直如見溟滓。位置豈肯同沙礫。長路相將拂劍隨。天陰勿使精靈得。

詩數雄渾流麗。步驟中程。

次韻元日朝賀

宮漏催朝燭影斜。千官鳴玉動晨鴉。交龍擁日明丹辰。飛鳳隨雲繞畫車。宴罷載花經苑路。詩成傳草到山家。小儒未得隨冠冕。遙聽鈞天隔綵霞。

登一有南字岳

萬壑千峯次第開。帆融最上氣崔嵬。九江水盡荆揚去。百粵山迷翼軫來。入樹恐侵玄帝宅。牽蘿思上赤靈臺。明年更擬尋春興。應及瀟湘雁北回。

詩藪全篇整麗首尾勻和。

句

國蟠蝸角小。地接犬牙深。雨暗蛟龍出。天晴鶴鶴回。江路篔簹籜。山田稻始苗。黃歸幽徑犢。青聚古祠鴉。灑竹鳴宮女。持弓泣野臣。雨蒸歸日路。雲合去時山。衡廬樹入青天盡。章貢波翻白日來。

中天日月迴金闕。南極星辰繞玉衡。交龍擁日明丹戾。飛鳳隨雲繞畫車。載筆舊登天祿閣。將書還到大明宮。百粵雲山連楚大。六朝煙樹入隋荒。焚香鳳閣春開宴。鳴玉龍池午散朝。

詩藪元人先達者。無若元好問趙子昂。元金遺老趙宋宗枝也。元體備格卑。趙詞雅調弱。成都諸子。乃一振之。伯生典而實。仲宏整而健。德機刻而峭。曼碩麗而新。至大家逸格浩蕩沈深之軌。概乎未聞也。同時傳若金張仲舉不甚知名。而近體特多宏壯。傅如云云。張如云云。七言律傳如云云。張如云云。皆高華雄暢。得杜陵句格。特變態差少耳。而詩流不能舉其姓氏。良可歎也。

黃裳

留別

江岸梅花正白。船頭細雨斜飛。行客三冬北去。將軍一棹南歸。

南翁夢錄。軍頭莫記東潮人也。出身行伍。酷好吟詩。元統間。伴送元使黃裳。裳亦好詩者。旬日。江行。相與唱和。多有佳句。裳甚歎之。至界上。留別詩云云。

宋鑒

鑒。字顯夫。大都人。擢泰定甲子進士第。官至翰林直學士。有燕石集。

寄張仲容二首

城南城北渺風煙。一度論文月再圓。腸斷而今更愁絕。蓬萊雲隔楚江天。

燕石集自注。仲容時以禮曹掾接漕舟在海上。先予一日出都。素與予契誼甚厚。雖同居京師。然各以塵事稀復接見。常謂小別難。欲賦一詩。此篇首二句。小別離詩起句也。今足成之。

閩鄉道中

風雨度崢嶸。新晴喜若何。雲間瞻大華。馬上看黃河。心已爲形役。身兼抱病多。平生遠遊志。垂老漸消磨。燕石集。商洛秦陝。步步皆陳蹟。亦猶山陰道中。使人應接不暇。長安城中碑刻。亦不能徧覽。況近郊乎。雁塔梯級久廢。曲江在其東。而亦久涸。一登含元殿故基。未央宮在漢城。愬遽不及至。但求得一瓦而已。興慶池廣袤五七餘里。荷菱藻芡彌望。岸傍古垂楊甚多。口南白鹿坡甚近。華萼相輝。太真梳洗等樓基皆儼然。僕始至。及邀諸公迎送。皆在長樂坡。灞橋嘗一過。灑水嘗一過。華清一浴。繡嶺一觀。華陰顯靈宮。并岳神題名。歸程過藍關秦嶺。宿藍橋。觀裴杭洞。上七盤嶺。下看鞞口莊。商山四皓基。又廟外此皆不暇及也。余年來行四方。見山水頗多。然各有可取。至于長安城。

中望終南山。天古今妙絕也。惜病多才劣。且奪于飲宴。不及富于吟咏。

揭曼頌小僕鄒福頗能作詩。是時諸名勝皆有所贈。

福也。事人初不切學詩。習字欲自別。不似南鄰守舍兒。輕裘肥馬通關節。

珊瑚木難。揭曼頌題鄒福詩後。右鄒福詩七首。鄒福者。吾鄉田夫之子也。粗讀孝經論語。家貧。與人傭耕。泰定五年。余居憂於家。其父遣從余。給薪水之勞。然暇則密自觀書。居五年。余攜至京師。會新天子明年春。開奎章閣。置授經郎。以教勸舊大臣子弟之在左右者。以國子教授廬陵林希顏。及余爲之。寅入酉出。令福守舍。以盡日閉門讀書習字。閒爲小詩。及莫。則請可否於余。余或方倦欲休。或方讀書。有會意處。或執筆爲文章。思方屬。必執而告之。不使幾微見余懈怠。意今年秋。遷承藝文。得簡靜無事。請問之時益富矣。余適墜馬在告。福有所作。皆可觀。因取其法度音節。尤近者得七首。爲書之。仍題其後。以爲世之世臣學士大夫之子弟。不知學者勸。余在閣中。福又從林希顏學國書。希顏稱其可教。余數年於文事。使令蓋深得其助焉。因並識於此。

閏十二月二十七日喜雪二首。前二日平章徹里帖木兒竄南安。

積禍丘山重莫蠲。君恩如海聽南遷。品流懸絕昌黎叟。一樣藍關馬不前。姓名何事到金甌。滄海橫流浩莫收。鵠立白袍三百箇。有誰回首望崖州。

元詩選。徹里帖木兒爲江浙平章。會科舉驛請試官。供張甚盛。心頗不平。及復入中書。首議罷科。

舉及論學校莊田租。可給宿衛士衣糧。至元元年科舉罷。其明年徹里以罪徙。六年十二月。乃詔復行科舉。

句

行人不敢來飲馬。稚子時能坐釣魚。

山居新話。國朝有禁。御溝不許洗手飲馬。留守司差人巡視。犯者有罪。故宋顯夫御溝詩有云云。可謂紀實矣。

張仲容

七夕寄宋顯夫

雲壓高城雨散絲。萬家秋氣入羅帷。巧棚七夕喧鄰里。小宋明朝定有詩。

燕石集。張仲容七夕來徵詩。就次韻以答云。鈿合紅蛛綴網絲。玉兒瓜果設香帷。從來天上張公子。解識梧桐一葉詩。自注來詩云云。

呂思誠

思誠字仲實。平定州人。擢泰定元年進士第。官至中書左丞。諡忠肅。有仲實集。

寄內

自從馬上苦思卿。一個窮家兩手擎。少米無柴休懊惱。大男小女好看成。恩深夫婦情何極。道合君臣義更明。早晚太平遂歸計。連杯共飲話離情。

水東日記。呂忠肅公思誠。耿恆庵尙書曾祖妣之兄也。天順四年。予過南都。飲尙書太平里第。尙書因誦公寄內詩云云。大抵公之詩情真語切。要亦出元白云。

戲作

典卻春衫辦早廚。老妻何必更躊躇。瓶中有醋堪燒菜。囊裏無錢莫買魚。不敢妄爲些小事。只因曾讀數行書。嚴霜烈日皆經過。次第春風到草廬。

輟耕錄。呂仲實先生未顯時。一日晨炊不繼。欲攜布袍買米於人。室氏有吝色。因戲作一詩云云。後果及第。

廖毅

毅字宏道。建康人。

伍王廟

浩浩凌雲志。巍巍報國心。忠魂與潮汐。萬古不消沈。

錄鬼簿。泰定三年丙寅春。因余友周仲彬與之會。卽敘平生懽。時出一二舊作。皆不凡俗。天歷二年春。抱疾。喪於友人江漢卿家。公能書。善行文。不草率。題伍王廟壁。有折桂令一曲。及有絕句云云。其感慨激烈。徒增悵快。噫。天之生物也。裁成輔相。以左右民。奈何如是之偏戾也。

陸居仁

居仁字宅之。華亭人。中泰定三年鄉試。隱居教授。自號巢松翁。又號雲松野褐。瑯湖居士。有雲松

野褐集

楚人弓

楚人弓。懸兩石。五十萬矢。陷強敵。絳人弓。箭三。一作二隻。長歌入關。成偉績。多箭不如少箭力。制敵若在。弓矢間。鳴條牧馬。高於一作如山。

大雅集鐵雅評曰。史斷入詩。箴警多矣。

國馬足

國馬足。吉行五十。轡如沃。天馬足。一日千里。更神速。國馬天閑。飽芻粟。太行鹽車。天馬哭。

大雅集鐵雅評曰。自托可悲。句短而意無窮。

李黼

黼。字子威。潁人。泰定四年。以明經魁多士。授翰林修撰。官至江州路總管。盜起。城陷。死之。諡忠文。

感事

彌勒何神。孕禍胎。鼙鼓動地起風埃。煙銷郡國。民生苦。血染江淮。鬼物哀。人世百年遭此厄。天戈萬里幾時來。石田也有藍田玉。可惜同成一炬灰。

草木子。李黼守江州日。妖寇彭和尚攻之。城陷死之。先城未陷時。嘗有詩云云。

薩都刺

薩都刺。字天錫。別號直齋。本答失蠻氏。後爲雁門人。登泰定丁卯進士第。官至河北廉訪司經歷。



有雁門集

列朝詩集。方谷珍盛時。招延士大夫。折節好文。與吳中爭勝。文人遺老。如林彬。薩天錫。輩。咸往依焉。

至正直記。京口薩都刺。本朱氏子。冒爲西域回回人。長詠物賦詩。如鏡中燈。鶴骨笛之類。金陵謝宗可效之。然拘於形似。欠作家風韻。且調低。識者不取也。

送欣上人笑隱住龍翔寺

江南隱者人不識。一日聲名動九重。地溼厭看天竺雨。月明來聽景陽鐘。衲衣香暖留春麝。石鉢雲寒臥夜龍。何日相從陪杖屨。秋風江上採芙蓉。

閒中今古錄。薩天錫嘗有一詩。送濬天淵入朝。地溼厭聞天竺雨云云。聞者無不膾炙。惟山東有一叟鄙之。公以素愜意。訪問其故。叟曰。此聯措詞固善。但聞字與聽字合耳。公曰。當以何字易之。叟徐曰。看天竺雨。公詰其看字。叟曰。唐人有林下老僧來看雨。公俯首拜爲一字師。案今古錄。作送天淵。雁門集作送笑隱。今題從雁門集。

紀事

當年鐵馬遊沙漠。萬里歸來會二龍。周氏君臣空守信。漢家兄弟不相容。只知奉鬻傳三讓。豈料游魂隔九重。天上武皇亦灑淚。世間骨肉可相逢。

歸田詩話。薩天錫以宮詞得名。其詩清新綺麗。大率相類。惟紀事一首。直言時事。不諱云云。蓋秦

定帝崩於上都。文宗自江陵入據大都。而兄周王遠在沙漠。乃權攝位。而遣使迎之。下詔四方云。謹俟大兄之至。以遂固讓之心。及周王至。迎見於上都。歡宴一夕。暴卒。復下詔曰。夫何相見之頃。宮車弗駕。加諡明宗。文宗遂卽眞。皆武宗子也。故末句云然。

玉華宮監禮詠事

大禱天香出內宮。孝思與世總無窮。百年禮樂行三獻。一派笙韶起半空。使者領班雲氣裏。女仙搖珮月明中。小臣監禮陪清列。兩袖葵花映燭紅。

河朔訪古記。玉華宮在真定路城中。衙城之北。潭園之東。是爲睿宗仁聖景襄皇帝之神御殿。奉安御容者也。華麗擬於宮掖。制命羽流。崇奉香燈。歲時月日。中書以故事奏聞。命集賢院臣代祀。函香致醴。遣太常雅樂。具朝服。備牲牢。行三獻之禮。元統乙亥。監禮官薩都刺天錫。有詩詠其事。云云。

宮詞

深夜宮車出建章。紫衣小隊兩三行。石闌干畔銀燈過。照見芙蓉葉上霜。

京城春日

燕姬白馬青絲韁。短鞭窄袖銀鐙光。御溝飲馬不回首。貪看柳花飛過牆。

山居新話。薩都刺宮詞云云。人莫不膾炙之。予以爲擬宋宮詞則可。蓋北地無芙蓉。宮中無石闌干。肇執宮人紫衣。大朝賀。則於侍儀司法物庫關用。平日則無有也。宮車夜出。恐無此理。又云云。

國朝有禁。御溝不許洗手飲馬。

四時宮詞

御溝漲暖綠潺潺。風細時聞響佩環。芳草宮門金鎖閉。柳花簾幕玉鉤閒。夢回繡枕聽黃鳥。困倚雕闌看白鷗。落盡海棠天不管。修眉慚恨鎖春山。

宮詞

楊柳樓心月滿床。錦屏繡縵夜生香。不知門外春多少。自起移燈看海棠。

煙精雋。薩天錫以賦宮詞得名。其四時宮詞。姑舉一二。御溝云云。又四時宮詞絕句。清夜宮車云云。楊柳云云。可謂豪險富麗爽闐者矣。

彭城雜詠

雪白楊花撲馬頭。行人春盡過徐州。夜深一片城頭月。曾照張家燕子樓。

歸田詩話亦脫灑可誦。

芙蓉曲

秋江渺渺芙蓉芳。秋江女兒將斷腸。絳袍春淺護雲暖。翠袖日暮迎風涼。鯉魚吹浪江波白。霜落洞庭飛木葉。豈舟何處采蓮人。愛惜芙蓉好顏色。

西湖竹枝集其詩風流俊爽。修本朝家範。宮詞芙蓉曲。雖王建張籍。無以過矣。

南臺看月歌

城南江上逢中秋。城南石梁初截流。長虹一道貫秋色。中分百里江南州。殘霞燒盡魚尾黑。金蛇翻動三江白。冰輪展出碧玻璃。照見釣龍臺上客。臺中之客懷古心。黃河泰華三登臨。今年攜月醉臺畔。越水越山爲月吟。無諸城裏人如海。無諸故塚堆殘籬。無諸臺上草離離。龍去臺空幾千載。昔龍已去江悠悠。今龍雖在人未求。懷珠豈立此臺下。腰上黃金臺上鉤。乾坤四顧渺空闊。詩書元氣行勃勃。合沙古識此其時。天下英雄求一決。南臺月照男兒面。豈照男兒心與肝。燕山賈駿金萬斛。萬里西風一劍寒。

登烏石山仁王寺橫山閣

千尺金蓮座。煙霞擁地靈。山川幾輛屐。日月兩浮萍。烏沒天垂海。龍歸水在瓶。深堂說法夜。應有石頭聽。

立秋日登烏石山

海國山四圍。繁華坐消歇。樓觀沈夕陽。鴻雁下秋色。水邊無麗人。石上多古刻。感此暮歸遲。秋露滿山白。榕陰新檢引。竹窗雜錄家。藏天錫遺詩數卷。詞藻橫逸。真足馳騁虞楊。毋論石田松雪也。入閩賦詩頗多。今錄其數篇於后云。

蝦助詩

層濤濡沫綴蝦行。水母含秋孕地靈。海氣凍成紅玉脆。天風寒結紫雲腥。霞衣褪色脂流滑。瓊樓烹香酒力醒。疑是楚江萍實老。誤隨潮汐落滄溟。

七修類稿。右蝦助詩。乃元薩天錫作也。薩詩予家所藏。可謂全矣。亦失此律。况膾炙人口。特書之。

燕姬曲

燕京女兒十六七。顏如花紅眼如漆。蘭香滿路馬塵飛。翠袖籠鞭嬌欲滴。春風淡蕩搖春心。錦箏銀燭高堂深。繡衾不暖錦鴛夢。紫簾垂霧天沈沈。芳年誰惜去如水。春困著人倦梳洗。夜來小雨潤天街。滿院楊花飛不起。

過嘉興

三山雲海幾千里。十幅蒲帆挂煙水。吳中過客莫思家。江南畫船如屋裏。蘆芽短短穿碧沙。船頭鯉魚吹浪花。吳姬盪漿入城去。細雨小寒生綠紗。我歌水調無人續。江上月涼吹紫竹。春風一曲鷓鴣吟。花落鸞甕滿城綠。

織女圖一作題壽監司所藏美人織錦圖

蘭閨織錦秦川女。大姬啞啞弄機杼。小姬織倦何所思。簾幕無人燕雙語。成都花發江水春。門前馬嘶車轆轤。髻鬟兩珥看欲墮。蛾眉八字畫不伸。良人一去無消息。冰蠶吐絲成五色。柔腸九曲細於絲。萬縷春愁正如織。綺窗睡起聞早鶯。西樓月落金盤傾。暖霞拂地海棠曉。香雪潑戶梨花晴。日長深院機聲動。梭影穿花飛小鳳。水心驚起鴛鴦飛。花底不成蝴蝶夢。纖纖玉指柔且和。香鉤小轆裁春羅。滿懷心事付流水。澗日雲錦生層波。佳人自古多命薄。風裏楊花隨處落。豈知醜婦嫁田家。生則同衾死同椁。君不聞長安市上花滿枝。東家蝴蝶西家飛。籠中鸚鵡喚新主。門外侍兒更故衣。又不聞田家婦。日埽春蠶宵織布。催租縣吏夜打門。荆釵布裙夫短袴。我題此畫三嗟吁。百年醜好皆虛無。排雲便欲叫閭闔。爲我獻上齋風圖。

贈劉雲江宗師

羽人推轉阿香車。童子穿松拾翠華。天上賜衣霑雨露。山中詩錦織雲霞。瑤臺紫氣秋橫劍。石室丹光夜走砂。擬借茅君三白鶴。乘風騎到玉皇家。

臺山懷古一作越臺懷古

越王故國四圍山。雲氣猶屯虎豹關。銅獸暗隨秋露泣。海鴉多背夕陽還。一時人物風塵外。千古英雄草莽間。日莫鷓鴣嗚更急。荒臺叢竹雨斑斑。

竹窗雜錄。陸天錫爲福建憲司知事。有越臺懷古詩云云。刻碑在南臺山。故老云。碑仆。農家舁入作牆基。而字跡宛然。

三衢馬太守昂夫索題爛柯山石橋

洞口龍眠紫氣多。登臨聊和采芝歌。爛柯仙子何年去。鞭石神人此地過。烏鵲橫空秋有影。銀河垂地水無波。遙知題柱凌雲客。天近應聞織女梭。

雁門集。張習跋。嘗觀天錫燕姬曲。過嘉興。織錦圖。等篇。婉而麗。切而暢。雖雲石廉夫莫能道。如贈雲江。越臺懷古。題爛柯山石橋諸律。又和雅典重。置諸松雪道園之間。孰可疑異。

楊妃病齒圖

沈香亭北春晝長。海棠睡起扶殘粧。清歌妙舞一時靜。燕語鶯啼愁斷腸。朱唇半啓榴房破。臙脂紅注珍珠顆。一點春寒入瓠犀。雪色鮫綃溼香唾。九華帳裏薰蘭烟。玉肱曲枕珊瑚偏。金釵半脫翠蛾歛。龍髻天

子空垂涎。妾身日侍君王側。別有閑愁許誰測。斷腸塞上錦棚兒。萬恨千愁言不得。成都遙進新荔枝。金盤紫鳳甘如飴。紅塵一騎不成笑。病中風味心自知。君不聞延秋門。一齒作楚藏病根。又不聞馬嵬坡。一身澀血未足多。漁陽指日鞞鼓動。始覺開元天下痛。雲臺不見漢功臣。三十六牙何足用。朋眸皓齒今已矣。風流何處三郎李。

詩藪雄渾流麗。步驟中程。

元統乙亥。余除閩憲。知事未行。立春十日。參政許可用惠茶賦此以謝。

春到人間纔十日。東風先過玉川家。紫微書寄斜封印。黃閣香分上賜茶。秋露有聲浮薤葉。夜窗無夢到梅花。清風兩腋歸何處。直上三山看海霞。

詩藪全篇整麗。首尾勻和。

句

客遇鐘鳴飯。僧披御賜衣。

七修類稿。僧舊著黑衣。元文宗寵愛欣笑。隱賜以黃衣。其徒後皆衣黃。薩天賜贈笑隱詩云云。正謂此也。

山村猿索飯。竹塢鶴聽棋。浙江潮似雪。閩土臘如春。

詩藪薩天錫俊逸清新。歌行近體。時有佳處。如云云。晚唐語也。云云。晚宋語也。

海瘴連雲起。江湖入市流。故廬南雪下。短褐北風前。夜臥千峯月。朝餐五色霞。朔風吹野草。寒日

下邊城。

詩藪元五言律可摘者。薩天錫云云。

河漢入樓天不夜。江風吹月海初潮。詳趙孟頫下

胡善

善字師善。紹興諸暨人。泰定進士。

句

領檄來司教。臨危要致身。

輟耕錄至正乙未。以憲僉趙公舉爲松江儒學經師。越明年。苗寇至。欲燬孔子廟。善坐經席罵寇。寇怒殺之。先是善題詩於壁云云。及難死。果不誣。



# 元詩紀事卷十六

楊維禎

維禎字廉夫。號鐵崖。會稽人。登泰定丁卯進士第。官至江西等處儒學提舉。有鐵崖古樂府等集。七修類稿。廉夫母夢金鉤入懷而生。

又其號鐵崖。初居吾杭鐵冶嶺。後號鐵笛。至松江。得莫冶所製鐵笛。

列朝詩集。張伯雨序其樂府云。上法漢魏。而出入於少陵二李之間。隱然有曠世金石聲。又時出龍鬼蛇神。以眩蕩一世之耳目。斯亦奇矣。

又承學之徒。流傳公襲。槎牙鉤棘。號爲鐵體。

又維禎疾亟。撰歸全堂記。頃刻而就。曰。九華伯潘君迎我。擲筆而逝。

四友齋叢說。吾松呂璜溪。卽開應奎文會者是也。走金帛。聘四方能詩之士。請楊鐵崖爲主考。試畢。鐵崖第甲乙。一時文士畢至。傾動三吳。

雲林遺事。楊廉夫。好聲色。一日與元鎮會飲友人家。廉夫脫妓鞋。置杯酒其中。使坐客傳飲。名曰鞋杯。元鎮素有潔疾。見之大怒。翻案而起。連呼齷齪而去。

山堂肆考。元楊鐵崖在松江。嘗游盤龍塘。夜抵普門寺宿。盜伺其出。盡竊所蓄物。黎明家人往白之。先生賦詩不輟。語客曰。老鐵在是。區區長物。又奚足恤。

揮麈詩話。楊鐵崖在金粟道人家。每食。主人必出佳醞。以芙蓉金盤。令美妓捧勸。鐵崖出對曰。芙蓉盤捧金莖露。有能對者。贈以此盤。一妓應聲曰。楊柳人吹鐵笛風。遂以盤酬之。一坐傾倒。鐵崖逸編。先生自言。予用三體咏史。用七言絕句體者三百首。古樂府體者二百首。古樂府小絕句體者四十首。絕句人易到。吾門章木能之。古樂府不易到。吾門張憲能之。至小樂府。二三子不能。惟吾能之。故五峯李著作推爲咏史上手云。門人章琬識。

詩藪。元末楊廉夫歌行。聲價騰湧。今讀之。大率穠麗妖冶。佳處不過長吉文昌。平處便是傳奇史。斷漢魏風軌。未覩藩籬。而一時傳賞楮貴。信識真未易也。

詩藪。元五言絕。自廉夫樂府諸篇外。一代寥寥。卽虞楊氏集中。罕覩佳者。遠不如七言絕也。

西湖竹枝歌九首并序

予閒居西湖者七八年。與茅山外史張貞居。苕溪鄰九成輩。爲唱和交。水光山色。浸沈胸次。洗一時尊俎粉黛之習。於是乎有竹枝之聲。好事者流布南北。名人韻士屬和者。無慮百家。道揚諷諭。古人之教廣矣。是風一變。賢妃貞婦。興國顯家。而烈女傳作矣。采風謠者。其可忽諸。至正八年秋七月。會稽楊維禎。書於玉山草堂。

蘇小門前花滿株。蘇公堤上女當壚。南官北使須到此。江南西湖天下無。

鹿頭湖船唱。報郎一作片言。許郎金石剛。船頭一作阿奴。不宿一作是野鴛鴦。爲郎歌舞爲郎死。不惜黃金成斗量。

家住西湖新婦磯。勸君不唱縷金衣。琵琶元是韓朋木。彈得鴛鴦一處飛。  
湖口樓船一作行雲。湖日陰。湖中斷橋湖水深。樓船一作行雲。無柁一作心是郎意。斷橋有柱是儂心。  
病春日日可如何。起向西窗理琵琶。見說枯槽能卜命。柳州街口問來婆。  
小小渡船如缺瓜。船中少婦竹枝歌。歌聲唱入空侯調。不遣狂夫橫渡河。  
勸郎莫上南高峯。勸儂莫上北高峯。南高峯雲北高雨。雲雨相催愁殺儂。  
石新婦下水連空。飛來峯前山萬重。不辭妾作望夫石。望來或似飛來峯。  
望夫一朝又一朝。信郎信似浙江潮。浙江潮信有時失。臂上守宮無日消。

歸田詩話。西湖竹枝詞。楊廉夫爲倡。和者甚衆。皆詠湖山之勝。人物之美。而寓情於中。大率一律。  
麓堂詩話。詩貴意。意貴遠。不貴近。貴淡。不貴濃。如杜子美鈎簾宿鷺起云云。李太白桃花流水杳  
然去云云。王摩詰返景入深林云云。皆可與知者道。難與俗人言。王介甫得之曰。坐看蒼苔色。欲  
上人衣來。虞伯生得之曰。不及清江轉柁鼓。洗盞船頭沙鳥鳴。曰。繡畫美人時共看。塔前青草落  
花多。楊廉夫得之曰。南高風雲北高雨。雲雨相催愁殺儂。可謂閉門造車。出門合轍者矣。

### 鴻門會

天迷關地迷戶。東龍白日西龍雨。撞鐘飲酒愁海翻。碧火吹巢雙狻猊。照天萬古無二鳥。殘星破月開大  
餘。座中有客天子氣。左股七十二子連明珠。軍聲十萬振屋瓦。拔劍當人面如赭。將軍下馬力拔山。氣卷  
黃河酒中瀉。劍光上天寒。彗殘。明朝世地分河山。將軍呼龍將客走。石破天撞玉斗。

鐵崖古樂府先生酒酣時常自歌是詩。此詩本用賀體而氣則過之。

蓬窗日錄謝臯羽詩。余尤愛其鴻門譙一篇云云。李賀集中亦有鴻門譙一篇。不及此遠甚。可謂青出於藍矣。元楊廉夫樂府力追李賀。亦有此篇。愈不及臯羽矣。

漫興七首并序

學杜者必先得其性情語言而後可。得其性情語言必自其漫興始。錢唐諸子喜誦予唐風。取其去杜不遠也。故今漫興之作將與學杜者言也。

醴畫溪頭翠水家。水邊短竹夾桃花。春風嗾人狂無那。走覓南鄰羯鼓搗。  
丈人接羅白氍毹。花邊下馬不驚猜。環沈溪頭買酒去。高堂寺裏看碑來。  
長城女兒雙結丫。陳皇宅前第一家。生來不識古井怨。唱得後主後庭花。  
楊花白白縣初迷。梅子青青核未生。大婦當壚冠似瓠。小姑喫酒口如櫻。  
今朝天氣清明好。江上亂花無數開。野老殷勤送花至。一雙蝴蝶趁人來。  
南鄰酒伴辱相呼。共訪城東舊酒壚。柳下秋千閒絡索。花間喚起勸胡盧。  
我愛東湖舊廣文。更過水口覓將軍。醉歸嘗騎廣文馬。不怕打鼓噤黃昏。

鐵崖古樂府漫興者。老杜在浣花溪之所作也。漫興之爲言。蓋卽眼前之景。以爲漫成之詞耳。其情性盎然。與物而爲春。其言語似村而未始不俊也。此杜體之最難學也。先生此作。情性語言近似矣。

鸞堂詩話杜子美漫興諸絕句有古竹枝意韓退之亦有之楊廉夫十二首非近代作也蓋廉夫深於樂府當所得意若有神助但恃才縱筆多率易而作

春俠雜詞八首據韋疏編

金丸脫手彈鸚鵡。玉鞭嬉笑擊珊瑚。侍兒無賴有如此。知是霍家馮子都。  
花袍白面呼郎神。當街奪花不避人。天馬乘龍金絡腦。賈家貴婿正嬌春。  
柘林縱獵金毛鷹。花街行春銀面馬。夜宿倡家酒未醒。飄風吹落鴛鴦瓦。  
昨日布衣行九州。今日繡衣拜冕旒。馬前清道一千步。當街不敢闕高樓。  
千古才人不可到。

朱提注酒酒如池。太白淋漓喫不辭。上樓更衣玉山倒。腰閒帶脫金犀毗。  
關右新來豪俠客。姓氏不通人不識。夜半酒醒呼阿吉。碧眼胡兒吹筆笛。  
蜀琴聲奏雙鴛鴦。蟹竹鳴和雙鳳凰。夜闌酒醒不上馬。紫荊月墜西家牆。  
西江美人久不見。手把新題合歡扇。鯉魚憑送相思書。霸王門前水如箭。

復古詩集

鐵崖復古詩集太史曰此詞俠才冶思見於二十八字非貴公子具五色腸者不能也讀者豈可  
以唐人絕句求之哉

又四首據吳復編

石上葉生青鳳尾。階前花開黃鵠觜。美人弄水百花池。水洒花枝雙蝶起。  
宜男草生小院西。階前錦石與人齊。錢塘潮生當午信。丹雞飛上上頭啼。

鳳凰城外橫門道。小妓軍裝金線襖。春暉無賴苦撩人。自下雕鞍踢芳草。

美人遺我昆溪竹。未寫雌雄雙鳳曲。愛惜長竿繫釣絲。釣得西江雙比目。鐵崖古樂府

案復古詩集。春俠雜詞只八首。吳復編鐵崖古樂府。則係十首。無昨夜布衣。關右新來兩首。多出石上葉生。宜男草生。鳳凰城外。美人遺我四首。美人首又見詩藪。今並錄之。

秋千曲

齊雲樓外紅絡索。是誰飛下雲中仙。剛風吹起望不極。一對金蓮倒插天。

詩藪。春俠詞云。秋千曲云。無論溫韓。卽子建太白。降格揮毫。未知孰勝。

吳下竹枝歌七首。率郭麐仲同賦

三箸春深草色齊。花閒蕩漾勝耶溪。採菱三五唱歌去。五馬行春駐大堤。  
家住越來溪上頭。胭脂塘裏木蘭舟。木蘭風起飛花急。只逐越來溪上流。  
寶帶橋西江水重。寄郎書去未回儂。莫令錯送回文錦。不答鴛鴦字半封。  
馬上郎君雙結椎。百花洲下買花枝。罟罟冠子高一尺。能唱黃鸝舞雁兒。  
白翎鵲操手雙彈。舞罷胡笳十八般。銀馬杓中勸郎酒。看郎色似赤瑛盤。  
騎馬當軒鵲鷲靴。西風馬上鼓琵琶。內家隊裏新通籍。不是南州百姓家。  
小娃十歲唱桑中。盡道吳風似鄭風。不信柳娘身不嫁。真珠長絡守宮紅。

詩藪。七言絕如西湖吳下竹枝歌。及春俠宮詞續香奩遊仙等作。本學夢得致光。而筆端高爽處。

往往逼李供奉。漫興學杜。亦略近之。其才情實出趙揭諸家上。

題履元陳君萬松圖

紫芝道人天思精。南來新畫青松障。東家畫水西豕山。積棄陳縑忽如忘。突然槎枿生肺肝。元氣淋漓逼神王。亟呼圓瓦倒墨汁。盡寫髯官立成仗。羣爭十丈百丈身。氣敵千人萬人將。交柯玉瑣混鱗甲。屈鐵金繩殊骨相。石門雷霆白日傾。雨走蜩龍青天上。前身要是僧擇仁。五百蜿蜒見情狀。天台老林亦畫松。三株五株成冗長。我家東越大松岡。五鬣蒼蒼鬱相望。門前兩箇赤婆婆。上有玄禽語相向。雕龍梓客朝取材。伏虎將軍夜偷餉。安得射洪好絹百尺強。令泫陰森移疊嶂。鼓以軒轅之瑟五十弦。共寫江聲入悲壯。鐵厓逸編右寫似子昭異才。子昭工畫仕女花木。予懼其情過粉黛。則氣乏風雲。故書此詩以遺之子。昭讀此詩後得毋激作公孫大娘之劍乎。

海鄉竹枝歌

潮來潮退白洋沙。白洋女兒把耬耙。苦海熬乾是何日。免得儂來爬雪沙。門前海埭到竹籬。階前腥臊鬻子肥。孺子三歲未識父。郎在海東何日歸。海頭風吹楊白花。海頭女兒楊白歌。楊花滿頭作鹽舞。不與斤兩添銅駝。顏面似墨雙腳頰。當官脫袴受黃荊。生女寧當嫁盤瓠。誓莫近嫁東家亭。

鐵崖樂府自記海鄉竹枝。非敢以繼風人之鼓吹。於以達亭民之疾苦也。觀民風者。或有取焉。

雉朝飛并序

琴操有雉朝飛。多指牧犢子之作。據揚雄所記。則曰雉朝飛者。衛女傅母之所作也。衛女嫁齊太子。中道太子死。問傅母。傅母曰。且往當喪。喪畢。女不肯歸。終之以死。傅母悔之。取女所操琴于冢上鼓之。忽有雉出墓中。傅母撫雉曰。女果爲雉也。言未畢。雉飛而起。故其操曰雉朝飛。予以牧犢之歎。不如衛女之善死。有關世教也。故賦以補舊樂府之缺云。

雉朝飛。一雄挾一雌。雄死雌誓黃泥歸。衛女嫁齊子。未及夫與妻。青縞綰素結。一死與之齊。人言衛女蕩且離。烏得冢中有雉飛。琴聲鼓之聞者悲。

蟬精雋。是作端可以洗樂府之陋矣。

石婦操

章琬曰。石婦。卽望夫石也。在處有之。補入琴操。悲其志與精衛同。不必問其主名也。

山夫折山華。山頭朝音潮。石婦行人幾時歸。東海山頭有時聚。行人歸。啼石柱。石婦岑岑化黃土。

鐵崖復古詩集。太史曰。啼字妙。非啼婦也。乃化鶴來歸語華表意。

案吳復編鐵崖古樂府。在至正六年。章琬編鐵崖復古詩集。在至正二十四年。兩集相複者數十首。而時有異同。如此首山夫折山華句上。樂府本尙有峨峨孤竹岡。上有石魯魯二句。山頭朝石婦句。樂府本作歲歲山頭歌。石婦殆樂府本編後。維楨又有所改定。故琬本據之歟。

花游曲并序

至正戊子三月十日。偕茅山貞居老仙。玉山才子。煙雨中游石湖諸山。老仙爲妓者璠英賦點絳



脣詞已而午霽。登湖上山。歇寶積寺。行禪師西軒。老仙題名軒之壁。瑤英折碧桃花下山。予爲瑤英賦花游曲而玉山和之。

三月十日春濛濛。滿江花雨溼東風。美人盈盈煙雨裏。唱徹湖煙與湖水。水天虹女忽當門。午光穿漏海霞裙。美人凌空躡飛步。步上山頭小真墓。華陽老仙海上來。五湖吐納掌中杯。寶山枯禪開茗碗。木鯨吼罷催花板。老仙醉筆石闌西。一片飛花落粉題。蓬萊宮中花報使。花信明朝二十四。老仙更試蜀麻箋。寫盡春愁子夜篇。

六研齋筆記。至正戊子三月十日。會稽楊維禎。同貞居張伯雨諸人。遊石湖。有侑者瑤英與坐。各爲花游曲一章。詞情美麗。實一時之盛。

嬉春體五首。錢塘湖上作一云。賦僧唐體。遺錢塘詩人學杜者。

今朝立春好天氣。況是太平朝野時。走向南鄰覓酒伴。還從西墅買花枝。陶令久辭彭澤縣。山公祇愛習家池。宜春帖子題贈爾。日日春遊日日宜。

西子湖頭春色濃。望湖樓下水連空。柳條千樹僧眼碧。桃花一株人面紅。天氣渾如曲江節。野客正是杜陵翁。得錢沽酒勿復較。如此好懷誰與同。

何處被花惱不徹。嬉春最好是湖邊。不須東家借騎馬。自可西津買蹋船。燕子繞林紅雨亂。鳧雛衝岸浪花圓。段家橋頭猩色酒。重典春衣沽十千。

入山十里清涼國。三百樓臺迤邐開。岳王墳前弔東渡。隱君寺裏話西來。接果黃猿呼一箇。探花白鹿走

千迴風流文采湖山主。坡白應須屬有才。

楊子休官日日閑。桐江新棹酒船還。叮嚀舊客兼新客。漫浪南山與北山。好懷急就一斗飲。佳人能作五絃彈。君看此地經游輦。彷彿春風夢未殘。

草堂雅集先生所謂嬉春體。卽老杜以江上誰家桃樹枝。春寒細雨出疏籬爲體也。先生自謂代之詩人爲宋體所枯。故多作此體變之云。

六客詩

有客有客來洞庭。駕罔象兮騁奔鯨。千家含景雙龍精。玲瓏七竅羅天星。莫邪出匣鏗有聲。一鳴一止三千齡。

有客有客來西域。龍高昂兮頸雌霓。腹如巴蚡鳳非翼。口牙夜光集月魄。奇聲劈山椎霹靂。道人因之寫胸臆。

有客有客來象山。渡青海。飛龍灣。陪道主。登玉壇。吐星宿。呈琅玕。出入爪甲冰雪寒。號鬼母。驚神肝。一聲吹裂虎豹關。

有客有客來文山。如金如鐵堅非頑。文山頽不可攀。留爾亦足消羣奸。靜以安。方以直。帶蒼玉。佩文石。文星燦然守玄默。

有客有客來赤城。碧梧風裁光瓏玲。音含太古文七星。直如赤絲清如冰。洗秋壑。鳴秋聲。金舂玉應和以平。

有客有客來瀉池。幡然其腹蠢以癡。曾太古春風知。至今面肉凝如脂。祖龍朽腐不足奇。和風自活千年枝。

楊維禎七客者。志抱遺老人。嘗得斷劍於洞庭湖。緱氏子煉爲笛。又得古琴於赤城。相傳賈師相故物。得胡琴於大陵呂氏。得管於杭老宮人所。云宋道君內府物。又得玉帶硯一。古陶甕一。硯爲文文山之手澤。甕爲秦祖龍藏中器也。旣而闢一室以居六者。老人時燕居其中。六者皆以客遇之。而又命之名焉。以鐵笛形如龍狀。而聲如龍吟也。故名之曰洞庭鐵龍君。以胡觥聲相近。琴又主於律。口噤以珠。而聲又如貫珠然。故名胡琴曰西域斛律珠。以象出於象山。而以其齒爲管。又同於筒。故名以曰象山管氏筒。以古琴有焦尾材。又聲如秋聲。故名之曰赤城焦氏秋。硯本石。而玉帶文且出文山氏。故名之曰文山玉帶石。古陶出於瀉池君之墓也。盛酒於中。經歲不變。而折花其中。又能自葩實不死。故名之曰陶氏太古春。書洞庭。書西域者。紀異也。書文山者。尊忠臣也。書筒管而不書道君。書秋聲而不書秋壑。書太古春而不書瀉池君。以其所遇非其主也。老人古之廉士。今之怪奇人也。以不遇於世。又自客六者之間。而七焉。總而顏客之所曰七客者之寮。客主道人。而道人亦以客自目。蓋相忘於六者之間。不知主爲客。客爲主也。說光陰者。謂百代過客。人託一室於宇宙之內。雖亦客耳。人於形骸之外。有主客之分。是以物我相形。而閒閒之智。詹詹之言。鋒然而起。惟達者不與物競。而與化往來。至我忘物。物忘我。主客何有哉。道人旣自志。而且歌六客之詩云。

香奩八詠并序 錄四

吳閒詩社香奩八詠無春芳才情者多爲題所困縱有篇辭鄙婦學妝院體終帶鄙狀可醜也晚得玉樹餘音爲甲而長短句樂府絕無可拈出者一日雲菴王先生寄示踏莎行八闋讀之驚喜先生蓋松雪翁門人今年八十又三矣而堅強清爽出語娟麗此殆爲月中神仙謹付翠兒度腔歌之又評付龍洲生附八詩後繡梓以見王孫門中舊時月色雖曰喪亂固無恙也至正丙午春三月初吉錦窰老人楊維禎序

金盆沐髮

華清春晝賜溫泉。綰脫青絲散一編。翠雨亂跳花底月。黑雲半卷鏡中天。銅仙盤冷添甘露。玉女盆傾拾翠鈿。攏得雲鬢高一尺。罌冠新上玉臺前。

月奩勻面

一片清光照膽寒。玉容滿鏡掩飛鸞。素娥照見黃金闕。絳雪鎔開白玉盤。翠點柳尖春未透。紅生櫻顆露初乾。好風爲我披羅幙。一朵夫容正面看。

玉頰啼痕

天然玉質洗鉛華。怪底偏將半面遮。紅滴香冰融瀨髓。彩黏膩雨上梨花。收乾通德言難盡。點溼明妃畫莫加。聚得斑斑在何處。輕綃寄與薄情家。

黛眉顰色

按樂圖開列畫堂。春愁何獨損清揚。蜀山煙雨雙尖瘦。漢柳風霜兩葉蒼。素畫未成京兆譜。欲啼先學壽陽妝。蕭郎忽有歸期報。喜得天庭一點黃。

詩藪廉夫香奩八詠。收乾云云。索畫云云。銅仙云云。翠點云云。皆精工刻骨。古今綺辭之極。然是曲子語。約束入詩耳。句稍參差。便落王實甫關漢卿。

小游仙十二首錄一

麻姑今夜過青邱。玉醴催斟白玉舟。莫向外人矜指爪。酒酣爲我擘篔篹。

詩藪夢得竹枝。長吉錦囊。飛卿金莖。致光香奩。唐人各擅。至老鐵酒。奄四家有之。如勸郎莫上云云。其宛麗夢得。靡加麻姑云云。其瑰崛長吉。莫過。

元夕與婦飯

問夜夜何其。曉茲燈火夕。月出屋東頭。照見琴與冊。老婦紀節序。清夜羅酒席。右蠻舞裊裊。左瓊歌昔昔。婦起勸我酒。壽我歲千百。仰唾天上蛛。誓作酒中魄。勸君飲此酒。呼月爲酒客。婦言自可聽。爲之浮大白。鐵網珊瑚。老婦曰。人言天孫思妃。不如月娥守孤。不知羿婦相棄。以奔曷若織女相望。以久之愈也。

廬山瀑布謠并序

甲申秋八月十六夜。予夢與酸齋仙客游廬山。各賦詩。酸齋賦。彭郎詞。予賦瀑布謠。

銀河忽如瓠子決。瀉諸五老之峯前。我疑天仙。一作孫織素練。素練脫軸垂青天。使欲手把。一作借并州。

翦。翦取一幅玻璃煙。相逢雲石子。有似捉月仙。酒喉無耐夜渴甚。騎鯨吸海枯桑田。居然化作十萬丈。玉虹倒挂清冷淵。

堯山堂外紀。至正甲申秋八月十六夜。楊廉夫夢與酸齋仙客遊廬山。各賦詩。酸齋賦彭郎詞。廉夫賦瀑布謠。詰旦以語富春吳復。復拍几大叫曰。酸齋之詞滑稽諠浪。固風流才仙。而先生之謠。雄偉俊逸。真天仙也。

佛頂菊

蓮社淵明手自栽。頭顱終不惹塵埃。東籬若爲摩挲看。西域親曾受記來。妙色盡從枝上發。慧香直奔腦門開。明年九月重陽節。再托摩耶聖母胎。

七修類稿。元人謝伯理居松之泖湖。富而好禮。搆光淥亭。爲宴樂之所。九日會友於其間。有園丁以佛頂菊花方開。獻之筵間。求詩。衆爲賦之。時鐵笛道人楊廉夫在座。走筆云云。座客顧仲瑛奉觴稱曰。先生之作。誠可謂虎穴得子矣。

王烈婦詩

介馬馱馱百里程。青楓一夜血詩成。祇應劉阮桃花水。不似巴陵漢水清。

南濠詩話。宋王烈婦青楓嶺事。昭灼在人耳目。士大夫過而題詩者甚衆。楊廉夫詩云云。後廉夫得夢悔之。乃更作詩。有寧從湘瑟聲中死。不向胡笳拍裏生之句。則與前詩迥不侔矣。

改作

天隨地老妾隨兵。天地無情妾有情。指血齧開雲嶠赤。苔痕化作雪江清。願從湘瑟聲中死。不逐胡笳拍裏生。三月子規啼斷血。秋風無淚寫哀銘。

高坡異纂。楊廉夫題臨海王節婦詩云云。後廉夫無子。一夕夢一婦人謂曰。爾知所以無後乎。曰不知。婦人曰。爾憶題王節婦詩乎。爾雖不能損節婦之名。而心則傷於刻薄。毀謗節義。其罪至重。故天絕爾後。廉夫既寤。大悔。遂更作詩云云。後復夢婦人來謝。未幾果得一子。

### 題劉阮山

兩壻原非薄倖郎。仙姬已識姓名香。問渠何時歸來早。白首糟糠不下堂。

南濠詩話。元微之題劉阮山詩云云。後元遺山詩云云。予頃見楊廉夫詩蹟。亦有是作云云。較之二元。情致不及。而忠厚過之。

### 題宋宮觀潮圖

八月十八睡龍死。海龜夜食羅刹水。須臾海嘖龜赭門。地捲銀濤薄於紙。艮山移來天子宮。宮前一箭隨西風。劫灰欲洗蛇鬼穴。婆留朽鐵猶爭雄。望海樓頭誇景好。斷鼉已走金銀島。天吳一夜海水移。馬蹠沙田食沙草。崖山樓船歸不歸。七歲呱呱啼軹道。

七修續稿。嘗於先輩葉南屏家。見元人題宋宮觀潮圖詩。皆雄富雅健。感慨悲壯。因假回錄之。楊維禎詩云云。練川嚴恭。出宋宮觀潮圖。索余詩爲首唱。且曰。得奇語。始可抗浙江之奇觀。繼遣金露澆渴穎。飲酣爲之吐錦囊句。時至正廿年秋八月初。楊維禎在元白亭。試奎章龍香寶劑書。

大暑譙朱氏玉井香賦詩

朱公神仙人。冰雪照肺腑。祖帑閱羽化。祖書在冊府。門掩一畝宮。虹梁跨風渚。喬木八九株。梧桐雜槐櫟。中有玉井香。銀雲灑零雨。俗士不必來。佳朋來不拒。煮茶不無童。謀酒自有婦。核破玉刃霜。大桃筩卷金。空露上聲讀。方響歌洞仙。自題舞魔女。梧溪斥琴操。主者極能評詩。謂梧溪子擬琴操爲失體。可措鐵雅風味云。海嶽訂畫譜。米老爲書家三變也。棹歌發復留。冰花涼欲語。焉知人間世。大火虐如虎。

好古堂書畫記。楊鐵崖書一軸云。主正景午大暑。譙於朱氏玉井香。賦詩十有二韻。書似西枝。玉海。鶴屋。三才子共和之云云。箕尾叟在草元閣書。東魯先生攷校。

贈僧一初

一初閣黎諸法解。吹得道人雙劍蕭。大道不知宗北秀。看山直欲盡南條。

六研齋筆記。元僧仁一初。隱富陽妙智寺。楊廉夫與之善。廉夫鐵篋。惟一初能吹。楊贈之詩云云。

詠史

買妾千黃金。許身不許心。使君自有婦。夜夜白頭吟。

又

生爲仲卿婦。死逐仲卿棲。廬江同樹鳥。不過別枝啼。

詩藪。老鐵詠史。如云云。此類甚衆。亦大是伎倆人。然惟二十字可耳。要八字便入晚唐。

玉鏡臺



郎贈玉鏡臺。妾挂菱花盤。安得咸陽鏡。照郎心肺肝。

采蓮曲

東湖采蓮葉。西湖采蓮花。一花與一葉。持較阿侯家。同生願同死。死葬清冷洼。下作鎖子藕。上作雙頭華。

洞庭曲

道人鐵笛響。半入洞庭山。天風將一半。吹度白銀灣。

又

仙橋大於斗。浮之過洞庭。江妃渾未識。喚作楚王萍。

又

海上雙雷島。渾如灩澦堆。乖龍拔山脚。飛渡海門來。

桂水五千里

桂水五千里。瀟湘雨氣空。衡山七十二。望見女英峯。

詩藪。宋樂府小詩。殊寡。元惟楊廉夫。才情縹緲。獨步當代。名下士信無虛也。如云云云。酷是六

朝。又洞庭曲云云。率超異神俊。追蹤謫仙。非宋元語。

案鐵崖樂府。桂水五千里。別自一題。非洞庭曲。

席上作

江南處處烽煙起。海上年年御酒來。如此烽煙如此酒。老夫懷抱幾時開。

遵聞錄。張士誠以厚幣招楊廉夫甚急。勉行至姑蘇。適元以龍衣御酒賜士誠。廉夫因飲御酒。遂作詩云。士誠聞之默然。遂不強留。

七修類稿。張士誠開宏文館。固延致之。廉夫心知其異圖也。至無一字一語。終日酒酣臥睡。一日朝廷頒酒於士誠。廉夫以指寫塵桌一絕云云。張見之。知終不就。遂放歸。至天朝革命。又令近臣促入京師。廉夫託疾固辭。知不可得也。作詩緘死。有詩云。天子來徵老秀才。秀才嬾下讀書臺。商山肯爲秦嬰出。黃石終期孺子來。太守免勞堂下拜。使臣且向日邊回。袖中一管春秋筆。不爲旁人取次裁。二詩事熟誦人口。然考貝廷臣所作之傳。則廉夫於士誠處。未嘗到也。曾獻五論。并復書直詆所用非人。洪武三年正月。又嘗至京師。有疾回。或者廷臣之傳。尙當信也。

案堯山堂外紀。載楊鐵崖不赴召。有詩商山云云。明太祖閱之。乃云。老蠻子欲吾殺之以成名耳。遂放回。卽鐵崖集亦載此作。特句法小異。七修類藁。至有作詩緘死云云。不知太祖初卽位。遣詹同文幣徵。維楨賦老客婦謠。以見志。故宋景濂有不受君王五色詔。白衣宣至白衣還之句。若商山黃石一詩。乃福建邱葵爲宋秀才。不赴元世祖之徵而作。見本集。題爲御史馬伯庸達魯花赤徵幣不出。有述林霍詩話。亦載是詩。同安縣志。邱葵載入儒林。亦有却聘述詩事。卒後配享朱子祠。更按閩書。稱宋末科舉廢。葵杜門勵學。居海嶼中。自號釣磯翁。著書甚夥。

老客婦。老客婦。行年七十又一九。少年嫁夫甚分明。夫死猶存舊箕帚。南山阿妹北山姨。勸我再嫁我力辭。涉江采蓮。上山采靡。采蓮采靡。可以療饑。夜來道過娼門首。娼門蕭然。老老。老醜自有能養身。萬兩黃金在織手。上天織得雲錦章。繡成願補舜衣裳。舜衣裳。爲妾佩。古意揚清光。辨妾不是邯鄲娼。

藝苑卮言。高皇帝徵廉夫脩元史。欲官之。廉夫作老客婦示不屈。乃放之歸。

案珊瑚木難。謠後注有臣會稽楊維禎上七字。

珊瑚木難。詹同文撰老客婦傳。老客婦者。會稽楊維禎先生。以高科進士。仕有元三十年。今行年幾八十。而新天子以前朝老文學。思一見之。將延入禮筵文館。遺翰林詹同文奉幣。詣門起之。先生以老客婦謝使者曰。豈有八十歲老婦。去木不遠。而再理嫁者耶。明年。又遣松江別駕。追趣不已。賦老客婦詞一首。徹黠聽曰。皇帝以吾之能以能之。非殫吾所不能則否。否則惟有蹈海死耳。上允之。已而賜安車。詣闕廷。留百有二十日。禮文畢。史統定。卽以白衣丐骸骨。上成其志。弗受爵賞。仍給安車。還山。史館胄監之士。祖帳西門外。行路之人。望之如神仙異人。吁。客婦之謠。仲矣。

### 鍾山詩

鍾山千仞。楚天西。玉柱曾經御筆題。雲護金陵龍虎壯。月明珠樹鳳凰棲。氣吞江海三山小。勢壓乾坤五嶽低。願效華封陳敬祝。萬年聖壽與天齊。

七修類稿。太祖初召楊廉夫見。令賦鍾山詩。援筆立就。云云。太祖曰。此詩值一千貫。今日庶事方殷。姑賜五百貫過日。

無題效商隱體四首與袁子英同賦

當軒隊子立紅靴。龜甲屏風擁絳紗。公子銀瓶分汗酒。佳人金勝翦春花。曲調青鳳歌聲轉。觥進黃鸝舞勢斜。五十男兒頭未白。臨流洗馬走紅沙。

主家防落近連昌。燕子歸來舊杏梁。金埒近收青海駿。錦籠初教雪衣娘。卷衣甲帳春容曉。吹笛西樓月色涼。今夜阿鴻新進劇。黃金小帶荔枝裝。

二月皇都花滿城。美人多病苦多情。一雙孔雀行瑤圃。十二飛鴻上錦箏。酒掬真珠傳玉掌。羹分甘露倒銀罍。不堪容易少年老。爭遣狂夫作後生。

天街如水夜初涼。照室銅盤璧月光。別院三千紅芍藥。洞房七十紫鴛鴦。繡靴踟躕句驪樣。羅帕垂髻女直妝。願汝康強好眠食。百年歡笑未渠央。

句

小洞桃花落香雪。大堤楊柳舞晴煙。

歸田詩話楊廉夫詩公子云云。金埒云云。又云云。皆言宴賞游樂之意。亦其平生性格所好也。

句

安危豈料關天步。生死猶能繫俗情。

歸田詩話詩社以楊妃襦爲題。楊廉夫一聯云云。題目雖小。而議論甚大。所以諸人莫能及。

# 元詩紀事卷十七

朱仲明

仲明字□□。號北軒。休寧人。

大有年

五穀皆登。幾載無。今秋端不負。菑畝已欣。億秭倉箱積。肯數尋常儋石儲。卦象曾占天上火。牧人應協夢中魚。麟經二百餘年久。似此豐穰僅一書。

元詩癸集。近于休寧陳氏。得明經書院考評一册。乃其先世定字先生櫟遺筆也。泰定間。有小桃源詩盟。定字以大有年爲題。得三百三十七卷。與星源胡初翁存菴定其甲乙。加之評。取中者三十名。一曰都魁。卽仲明卷。二曰亞魁。爲康衢遺民卷。其對仗可採者。如康衢遺民云云。二十六名。程維巖云云。二十九名。胡祥云云。亦能切題。餘卷語多陳腐。

楊得祿

得祿字□□。休寧人。

大有年

乃夢維魚卜歲登。東臯南畝力深耕。一犁春雨欣沾足。百穀秋風喜用成。作息不知蒙帝力。謳歌聊以樂吾生。重書大有光千古。鼓腹含哺樂太平。

明經書院考評第五名。胡初翁存菴評曰：首聯清妥，次聯平易，絕似陸放翁調度。

汪志堅

志堅字□□，祁門人。

大有年

五十年無赤白囊。民安田井樂畊桑。雞豚社雨家家酒。穠極外風處處香。已驗天文占斗覆。賸收地利應金穰。王風喜值時雍盛。仰祝皇圖日月長。

明經書院考評第八名。存菴評曰：首聯句法秀整，次聯亦襯貼不苟，當是作者。

胡元采

元采字□□，黟縣人。

大有年

時和歲稔樂無邊。大有堪書續魯宣。居積困禾皆萬億。佇看斗米只三錢。花村月照犬無吠。化國日長人醉眠。童叟相觀皆額手。從茲深願屢豐年。

明經書院考評第十六名。存菴評曰：後聯詩人之詩也。

程維巖

句大有年

史筆特書當繼魯。詩聲播頌載歌周。詳朱仲明下

胡祥

句同上

易地時霑沛然雨。平疇輕拂快哉風。同上

柯九思

九思字敬仲。仙居人。蔭補華亭尉。不就。官至學士院鑒書博士。自號丹邱生。有丹邱生稿。

宮詩十五首

萬國貢珍陳玉陛。九賓傳贊卷珠簾。大明前殿筵初秩。勳貴先陳祖訓嚴。

自注。凡大宴。世臣掌金匱之書。必陳祖宗大札。撒以爲訓。

黑河萬里連沙漠。世祖深思創業艱。數尺闌干護春草。丹墀留與子孫看。

自注。世祖建大內。命移沙漠莎草於丹墀。示子孫毋忘草地也。

親王上蠶宴西宮。聖祚中興慶會同。對捲珠簾齊仰聖。瑞雲捧日御天中。

自注。天歷元年十二月二十七日。篤伶帖木兒怯薛。第二日寶房內對速古兒赤。明里董阿。平章

月魯不花。右丞大都赤哈刺八。尚書。有來典瑞院官吉寶兒。同僉答失蠻。經歷柯都事奏。

十月二十三日。上都送寶來的時分。與聖殿御宴。其間有五色祥雲。捧日當殿。本院官院判鄭立。

經歷張符。都事柯九思等。與衆於殿前一同仰觀。郁郁紛紛。非霧非煙。委係卿雲現。似這般祥瑞。

應時呵。如今與省家文書行移。國史院標寫入史呵。怎生奉聖旨。您每行文書者。

四海昇平一事無。常參已散集諸儒。傳宣羣玉看名畫。先進開元納諫圖。

自注。凡御覽法書名畫。羣玉內史掌之。

萬里名王盡入朝。法宮置酒奏簫韶。千官一色真珠襖。寶帶攢裝穩稱腰。

自注。凡諸侯王及外番來朝。必錫宴以見之。國語謂之質孫宴。質孫。漢言一色。言其衣服皆一色也。

官家明日慶生辰。準備龍衣熨帖新。奉御進呈先取旨。隋珠錯落間奇珍。

自注。御服多以大珠盤龍形。嵌以奇珍。曰鴉忽。曰喇者。出自西域。有直數十萬定者。

傳宣太府頒宮錦。近侍承恩拜榻前。製得袍成天未曉。著來香殿賀新年。

自注。臘前分賜近臣襖材。謂之拜年段子。

鳳城女樂擁祥煙。梵座春游泮管弦。齊望綵樓呼萬歲。柘黃止在五雲邊。

自注。故事。二月十五日。迎帝師游皇城。宮中結綵樓觀之。

花明畫錦柳搖絲。仙島陪鑾灑禊時。曲水番成飛瀑下。逶迤銀漢接清池。

自注。故事。上巳節。錫宴於萬歲山。

儒臣春值奎章閣。玉陛牙牌報未時。仙仗已迴東內去。牡丹花畔得圍棋。

自注。上日御奎章。報未時。則還內殿矣。

玉腕調冰湧雪花。金絲繡扇繡紅紗。綵箋御製題端午。勅送皇姑公主家。



自注皇姑者魯國大長公主皇后之母也。天歷二年端午。上賜甚厚。并御詩送之。

觀蓮太液泛蘭橈。翡翠鴛鴦戲碧苔。說與小娃牢記取。御衫繡作滿池嬌。

自注天歷間御衣多爲池塘小景。名曰滿池嬌。

珠宮錫宴慶迎祥。麗日初隨綵線長。太史院官新進歷。楊前一賜諸王。

自注每歲日南至。太史進來歲歷日。

元戎承命獵郊坰。勅賜新羅白海青。得雋歸來如奏凱。天鵝馳送入宮庭。

自注海青者海東俊鶻也。白者尤貴。有數十金者。

玉漏藏機水暗流。眞珠射日動燈球。偶人自解開青瑣。高拱龍床報曉籌。

自注大明殿有燈漏。飾以眞珠。內爲機械。以小木偶人十二。捧十二相屬。每辰初刻。偶人相代開

小門。出燈外板上。直御床。立捧辰所屬以報時。

西湖竹枝集宮詞。追王建墨竹。法文湖州名重當時云。

梧溪集題柯博士敬仲宮詞後。帝作奎章。礙石渠。花明長日幸鑾輿。丹邱詞氣凌司馬。封禪何如

諫獵書。

送趙虛一還金陵書虞翰林詩後

詞臣通籍侍金闈。天語從容問舊蹊。雲外山高龍虎踞。人間松老鳳凰棲。翰林擬詔當紅藥。道士疏封出紫泥。更賜金錢祠泰畤。寥陽前殿麗璇題。

草堂雅集虞翰林詩并序曰天歷二年三月廿五日集侍立延閣上顧問集嘗至金陵否集謹對曰嘗到又曰冶亭是汝所題往年八九至其處新松當長茂矣集謹對曰是未種松時到也近臣奏言道士趙虛一所種也上曰然已陞觀爲宮汝知之乎集謹對曰臣奉敕題榜賜之矣是日歸虛一來別歸江南卽告以聖上不忘冶亭之意又三日吳大宗師持卷來索詩贈行因錄所得如上云詩曰春明畫侍奎章閣聖上從容問冶亭爲報仙都趙眞士新松好護萬年青

蘇文忠天際烏雲卷九首

山中覆一作見鹿拾蕉葉眼底生花二月明不道人生俱夢裏新詩猶話夢中情

綠窗度曲初含笑銀甲彈箏不露尖人生莫待頭如雪華屋春宵酒屢添

雲中初下勢如驚白鳳蹁躑雪色飒多少舊遊歌舞地不堪回首又重經

桃花扇底露脣紅一作無復梳妝與衆同一曲山香春去也一作意動茶麝無語謝東風

一顆摩尼不染塵瑤池玄圃度千春寥陽殿裏雲深處誰是當時解佩人

三月旂旗幸玉泉牙檣錦纜御龍一作清船千官車騎如雲湧一作擁楊柳梢頭月色娟

長憶眉菴鶴髮翁舊時阿閣贊皇風如今流落那堪說黼黻文章似夢中

鼓瑟湘靈欲斷魂洞庭風一作波浪不堪論一作閒遙知舊賜宮袍一作文雷錦雙袖龍鍾總淚痕

興聖宮中坐落花詩成應制每相誇廬山面目秋來好白杖青藜步白沙

自跋此卷天歷間得之都下余愛坡翁所書之事俊拔而清麗令人持玩不忍釋手故侍書學士

虞公見而題之。余攜歸江南。會荆溪王子明同余所好。攜之而去。他日再閱於環慶堂。俯仰今昔。爲之慨然。因走筆盡和卷中之詩。以舒其悒鬱之氣。傍觀者子明之兄德齋。淮南潘純。金壇張經。長安莫浩。至正三年夏五月。丹丘柯九思書。

至順初。上嘗御奎章閣。太禧使明理董阿。中書左丞趙世安。大司農卿哈喇八兒侍。上從容詢求江南士。臣九思以韓性。張翥。應詔。上曰。俟修皇朝經世大典畢。卿至江南刊梓時。可親爲朕召此二人者來。試之館閣。臣九思再拜曰。幸甚。後有近臣自南使還者。上問此二人。其人亦曰。佳士。上頗悅。後竟因循遂隔。今舉事玉山。思之泫然流涕。玉山請詩以記。因爲四十字。以寄二子云。

二美人間少。胡爲滄海涯。文章聯璧貴。聲譽九重知。宣室今無召。丘園謾有詩。蒼梧雲鬢鬢。回首淚空垂。

草堂雅集

酬陸友仁城南雜詩十首錄有注三首

尺五城南憫忠閣。平壤歸來有所思。魏徵不作碑已仆。朝廷久乏諫諍姿。憫忠閣乃唐時建。虜征高麗戰沒之士。

尺五城南故國基。武元皇帝有穹碑。苔痕手剝推終始。載記他年備拾遺。金太祖也。

尺五城南話往年。粧臺明月媚華筵。歡娛未了聞笳鼓。歧國雙娥鑠翠煙。粧臺者金章宗所築。以貯李宸妃。章宗嘗曰。二人土上坐。宸妃應聲曰。一月日邊明。章宗大悅。我太祖皇帝伐金之初。金宣宗嘗獻岐國公主以請和。故云。

草堂雅集

題趙松雪春山圖

落花飛絮春日間。散策深林獨往還。口成應對口人語。好似西湖西畔山。

丹丘生藁附注。此紀管仲姬畫眉時語也。

題文與可畫竹

湖州放筆奪造化。此事世人那得知。茫然何處見生氣。彷彿空庭月落時。

元詩選按敬仲善畫竹石。得筆法於文同。嘗自謂寫榦用篆法。枝用草書法。葉用八分。或用魯公撮筆法。木石用金釵股。屋漏痕之遺意。然其生意飛動。有龍翔鳳翥之狀。此詩所謂生氣。非敬仲不能道也。

題畫二首

春濃不放小禽棲。白髮衝冠向曉啼。簾幕半開人未起。樓臺風暖日猶低。  
春風嬌軟綠陰肥。上苑鶯花紫翠圍。卻向後宮深院裏。一枝閒自理金衣。

南濠詩話。柯博士九思。在奎章日。得出入內廷。後失寵。退居吳下。虞文靖公作風入松詞贈之。中亦微露此意。予聞柯嘗畫白頭黃鸝。題詞二絕云云。

句

夜雨推篷寫松石。焚香何處獨題詩。

雲林遺事。元鎮既散其田。而稅未及推。入國朝。催科者益集。元鎮逃去。潛於蘆葦中。燕龍涎香。竟蹤跡得之。故柯九思詩云。蓋道其實也。

又

雲飄五鳳層樓。日繞羣龍法駕來。鴛序久陪蒼水使。鳳池曾賦紫薇郎。詳趙孟頫下

哲理野臺

哲理野臺。字□□□人。占籍吳縣。天歷元年領鄉薦。

題水村圖

四野漫漫水接天。孤村林木似凝煙。莫言此地無車馬。自是高人遠市廛。詳錢仲鼎下

焦文燭

文燭。字仲明。淮陽人。

夜直

憶昨停驂使殿西。柳溝風軟絮霑泥。一彎月子梨花上。冷浸香雲伴鳥棲。

梧溪集。右社稷署奉禮郎焦君。追念先朝眷遇之隆而作也。少由文皇東宮時說書爲前職而卒。

白君之次子。日誦其詩。手寫詩意圖。

幹玉倫都

幹玉倫都。字克莊。

道園學古錄。奎章閣典籤玉倫都嘗以禮記舉進士。從予成均於閣下。又爲僚焉。

又幹君克莊曰。人樵於山。我樵於海。海無木。俟有浮槎斷梗。至君前者取之。故自命海樵子。

訪周古象不遇留題

事親未必可曾參。職分當爲每愧心。今口風來飄忽動。抱琴更入白雲深。

中洲野錄。周古象。蘄水人。生元末。事親孝。遭喪亂。入贅於淮。不見笑容。妻詰之。告以故。遂歸尋母葬之。廬墓二年。妻亡。終身不娶。淮西僉事幹克莊求見不遇。留題云云。復爲立孝里門。

甘立

立字允從。大梁人。辟爲奎章閣史。至丞相掾卒。

夜烏啼曲

月落城上樓。烏啼樓上頭。一啼海色動。再啼朝景浮。馬鳴黃金勒。霜滿翠羽裘。烏啼在何處。人生多去留。

和完一作宋學士晚出麗正門

西湖竹枝集。平日學文自負爲臺閣體詩。善鍊筋脫去凡近。其夜烏啼曲。可配古樂府云。

暮光霞彩炫金題。絳闕高居雉堞低。上相樓臺連御苑。中郎車騎過沙隄。阜雕孤振凌雲翮。紫燕雙翻踏雪蹄。回首上林涼月夜。繁珠多是鳳鸞栖。

句

詩藪全篇整麗。首尾勻和。

阜雕孤振凌雲翮。紫燕雙翻踏雪蹄。詳趙孟頫下

詩藪甘允從云云。

項炯

炯字可立。台之臨海人。

吳宮怨

繡楣灑黃紛。椒壁漲紅青。倚簷樹如鬼。深草蛇夜鳴。憫懷已無淚。古恨埋石局。

大雅集。鐵雅評曰。十字憎過牛鬼。憫懷無淚。尤勝無語。

公莫辭

龍蟠錦帳金奕奕。虎旗無際人馬立。肉林垂益陵。阜赤萬甕行。酒晴虹濕。大蛇中斷狂魄滅。重瞳無光射寶玦。雷憤風愁三尺鐵。河山未必如瓜裂。老荒掉珥語公莫。頭上青天懸日月。

大雅集。鐵雅評曰。錦囊子有奇語。無此奇氣。

空井辭

石闌古蘚青蓮錢。老梧石罅孤根懸。下有一斗琉璃泉。轆轤不鳴修綆斷。蛛網濛濛梧葉乾。

江南弄

篔簹深雨過。月色青。濕螢幾點風穿櫺。秋聲滿江龍一吟。江空漠漠懸疎星。鳳皇城頭石花吐。雷擊老樹蛇骨腥。鬼雄騎鼉潮際上。暗藤如山走漆鏡。

元詩選其古樂府如空井辭江南弄等篇酷似李長吉惜不多傳。

胡助

助字古愚一字履信婺州東陽人舉茂才官至太常博士有純白類藁純白齋類藁純白先生自傳監察御史周公景遠薦江浙士之博學通經能古文宜居館閣者七人首胡石塘徐方谷而先生與焉劉公輔之時爲臺郎贈詩有曰作者七人爾君才十倍加又取莊子漢陰抱甕語自號純白道人

上京紀行詩七首

同呂仲實宿城外早行

我行得良友夜宿建德門晨征帶殘雨華星綴雲陰局轡乘羸馬沿途共笑言兩京隔千重氣候殊寒暄聲利汨清思山川發雄文平生所未到扈蹕敢辭煩愧予雁鶩姿亦復陪鸞鷁歷歷紀瑰偉一見勝百聞茲遊償夙願庶用歸田園

昌平

經過昌平縣實惟劉子鄉當時直言策至今有耿光功名真瑣瑣氣節橫八荒斯人寧復見閱世徒慨慷奉祠表諫議化俗崇賢良賊臣偶同里遺臭亦難忘嚴程懼稽緩古跡嗟莫詳揮鞭事前邁居庸翠蒼蒼

居庸關

居庸古關塞老我今見之天險限南北亂石如城陴朝光暎蒼翠征袖涼颼颼澗谷四十里崖巒爭獻奇



禽鳥鳴相和。草木蔚華滋。佛爐架巖上。疏泉瀉清池。民居亦棋布。機磴臨山陲。清幽入行李。緩策遂忘疲。黃屋年年度。深仁育黔黎。從官多名儒。山石徧題詩。伊余備史屬。斐然愧文辭。矧茲中興運。歌誦職所宜。皇靈符厚德。豈曰恃險巖。

### 懷來道中

百千傲一馬。日行百餘里。未明卽戒途。將至輒中止。人困馬思睡。馬疲徒用箠。驅馳失情性。老病侵髮齒。可憐翰鞅掌。豈知固如是。徑行古關塞。形勢那盡紀。荒落久事靜。富庶或成市。清晨過懷來。沙草風煙美。想當用武時。滿野控弓矢。白塔遠招人。揮鞭渡流水。

### 李老谷

人言桑乾北。六月少炎熱。我行李老谷。流汗還病渴。疲馬鞭不進。況復礙車轍。翠巖石幽幽。久晴澗泉竭。牛羊放山椒。穹廬補林缺。投宿山店小。子規啼夜血。南歸空有懷。聞之愧剛決。願方上灤陽。玉堂看秋月。更闌不成寐。聲聲山竹裂。期是明年春。相聞在吳越。

### 赤城

山石似丹堊。赤城因得名。土異產靈瑞。永宜奉大明。市廛集商賈。有驛通上京。觸熱此經過。忽看風雨生。平原走潢潦。河流浩新聲。斯須卽開霽。燦爛雲霞橫。

### 鰲峰

乾坤氣磅礴。山石鍾奇形。鰲峰纔數尺。濯秀何亭亭。勢欲負厚地。岌若霄漢凌。一峰更旁聳。玲瓏穴虛明。

青膚縈白障。微扣宣金聲。中涵太湖潤。瑰偉專上京。想當初鑿時。山鬼泣以驚。置之玉堂前。幾閱瀛洲登。年來對閣老。岷峨眼中青。雨漬生古色。月寒見霜稜。摩挲助文思。一揮九制成。諒勿憂豪奪。長茲託佳名。

龍門行

龍門山險馬難越。龍門水深馬難涉。矧當六月雷雨盛。洪流浩蕩漂車轍。我行不敢過其下。引睇雄奇心。悸懾歸途卻喜秋泥乾。颯颯山風吹帽寒。溪流曲折清可鑑。萬丈蒼崖立馬看。

草堂雅集虞翰林題紀行集云。集仕於朝三十年。以職至上京者凡十數。馳驅之次。亦時有吟諷。不能如吾古熱。往復次舍。所遇輒賦。若是其周悉者也。集老且病。將乞身歸田。竹簾風輕。茅簷日暖。得此卷誦之。能無天上之思耶。卷中龍門後詩尤佳。歐陽玄功亦云。至順庚午十月廿八日。虞集題。

灤陽十詠

帝業龍興復古初。穹隆帳幄倚空虛。年年清暑大安閣。巡幸山川太史書。綠蘭青草玉花驄。馴鹿眠遊殿閣東。西梵祝釐環地坐。曛曛日色綵旗風。西清學士草黃麻。閣老承恩扈翠華。昨夜司天臺上望。文奎光燄照龍沙。小西門外草漫漫。白露垂珠午未乾。沙漠崢嶸車馬道。半空秋影鐵旂竿。板屋松煙染素衣。天街暑雨沒青泥。夜來沙磧秋風起。鳴鏑雲閒白雁低。御天門前開詔書。驛馬如飛到大都。九州四海服訓誥。萬年天子固皇圖。

斗北高寒無點暑。舉頭止見七星文。玉堂近與琳宮接。清夜步虛聲盡聞。  
朝來雨過黑山雲。百眼泉生水草新。長夏蚊蠅俱掃迹。葡萄馬湏醉南人。  
萬騎囊鞬列旆旌。周廬嚴肅駕將興。帳前月色如霜白。曉汲灤河窟裏冰。  
玉堂視草屋三閒。盡月籠峯相對閒。身遇太平鈴索靜。題名篆畢又南還。  
草堂雅集右灤京十詠。古愚親寫以寄。雖已刊於上京紀行集中。人不多見。今再附於此。以見皇  
元典章文物之盛事云。

上京紀行見玉泉山下荷花

西山咫尺玉泉清。無數藕花香氣生。立馬岸邊看不足。卻疑五月過臨平。

榆林

倦客出關仍畏暑。居庸回首暮雲深。清山環合勢雄抱。不見舊時榆樹林。

槍竿嶺二首

九折盤紆過客愁。適當載筆扈宸游。長年見說槍竿嶺。今日身親到上頭。  
下馬徐徐陟澗崗。山風微動十分涼。桑乾嶺上一回首。何處雲飛是故鄉。

再賦李老谷

李老谷中聞杜鵑。江南游子不歸田。利名引得滔滔去。竟渡灤河朝日邊。

過桓州

陰雲慘淡滿天秋。馬上龍鍾擁毳裘。漸近灤京涼又別。斜風細雨過桓州。

題望都舖

坡陀散漫草茸茸。地接烏桓古塞風。仰止神京三十里。樓臺縹緲碧雲中。

偶題

頭上陰雲如潑墨。塔前白雨似跳珠。秋來日日風雷作。併入灤陽八景圖。

宿牛羣頭

蕎麥花開草木枯。沙頭雨過茁磨菇。牧童拾得滿筐子。賣與行人供晚廚。

御花園

朱扉金鎖綠如雲。雨露恩光草木新。若識九重臨幸意。花時人世一般春。

純白齋類藁附錄呂思誠跋上京紀行詩。國家肇迹龍居河。而都和林。世皇迨今將百年。扈從文臣不知幾何人。余欲合中統至元及古愚後諸作爲觀風者之一助云。王士熙題後大章雍容小章深雅。陳旅跋五十首清妥秀潤。與寄閒適無急調無蹇詞。真盛世良作也。柳貫跋。昔予再遊灤陽。嘗隨景成詠。不能如古愚多且奇也。吳師道跋。吾東陽柳博士道傳。黃應奉。晉卿。今胡編修古愚。皆有紀行之作。前後輝映。一鄉而得三人焉。吁亦盛矣。

隱趣園八詠

君子池

池上藕花開。香從太極來。亭亭清淨觀。君子日徘徊。  
待月壇

天遠雲歸早。山高月上遲。夜坐發孤詠。秋風生桂枝。

蜀錦屏

濯錦爲屏障。紅妝擁萬妃。試看春睡足。何羨買臣歸。

天香臺

三月韶華盛。名花傾國人。何期真率會。同賞洛陽春。

香雪壁

醲醑春意好。百尺走條枚。壁立堆香雪。風流入酒盃。

晚香徑

彭澤歸來後。東籬菊正黃。秋光無限興。晚節有餘香。

竹澗亭

竹遶茅亭外。泉流石澗中。一天秋月夜。千載隱君風。

歲寒亭

松竹如佳士。梅花更典刑。歲寒千古意。笑指鹿峯青。

蘇天爵題後。太常胡先生。歸老東陽。有山林深遼之居。有圖書諷詠之樂。有子孫以具甘旨。有田

園以供伏臘。又值國家承平之世。優游以養高年。蓋亦福德之君子哉。

雅琥

琥字正卿。可溫人。登天歷第。初名雅古。文宗御筆改爲雅琥。官至廣西靜江府同知。

御溝流葉圖

彩毫將恨付霜紅。恨自綿綿水自東。金屋有關防虎豹。玉書無路託鱗鴻。秋期暗度驚催織。春信潛通誤守宮。莫道人間音問杳。明年錦樹又西風。

歸田詩話。雅正卿有四美人圖詩。惟御溝流葉最佳。

句

梅花路近偏逢雪。桃葉波平好渡江。一聲鐵笛千家月。十幅蒲帆萬里風。

詩藪。雅正卿云云。

楊瑀

瑀字元誠。錢塘人。天歷間召見奎章閣。官至建德路總管。

山居新話。元統間。余爲奎章閣屬官。題所寓春帖曰。光依東壁圖書府。心在西湖山水間。時余巖山爲江浙儒學提舉。寫春帖付男峒。寘於山居。則曰。官居東壁圖書府。家住西湖山水間。偶爾相竹。亦可喜也。

壽松記碑本

舉世紛紛名利間。達生輕祿古今難。天生瑞兆爲君壽。寄我山中作畫看。

山居新話。至正七年。社稷署太祝張從善。都城巨室也。方四十卽致仕。嘗預營壽室。解石板爲穴。門石中忽有紋成松石。雖繪畫者不如也。觀者填門。因以爲碑。而寘墳牆之中。翰林學士歐陽元。侍講學士揭傒斯。亦爲壽松記。刻石以表瑞。後附致碑本。示余求詩。漫以一絕賦之云云。

### 靜安八詠

陳檜

殿前雙檜鬱龍蛇。翠雨溟濛鎖綠霞。不逐後庭花片落。托根卻在梵王家。

靜安八詠。鐵崖評曰。可見此老志節。豈與紛紛者同日而語哉。

蘆子渡

路入西風十里秋。月明飛雪下汀洲。關山著處皆戎馬。容得山人不繫舟。

鐵崖評曰。此詩頗有興趣。亦佳。

赫德爾

赫德爾。字本初。□□人。官江浙參政。

句

水泝巔崖流自轉。山移絕塞勢尤雄。

山語新話。江浙參政赫德爾公。字本初。嘗云向任留守司都事。時本司諸先輩。同談內苑萬歲山。

太液池。本非我朝剏建。乃亡金之沼園也。初聖朝起朔庭絕塞。有一土山。形勢雄壯。峰巒秀異。金人望氣者言。此山有王氣。當出異人。非金之利。謀欲傾圮之。計無從出。時金已衰微。因通好。託以入貢爲辭。願求此山之土爲報。衆皆鄙笑而許之。金人遂掘其山。自備車馬挽載。運至幽州城北。積累成山。開挑海子。栽植花木。營構臺殿。以爲游幸之所。未幾。金亡。世祖皇帝登大寶。改築京城。山適在禁苑之中。至今塞土遺迹尙存。其土赤潤。草木不生。乃知帝王之宅。都會之京。興衰之兆。天已默定。豈人力之所能爲也。公因和萬歲山詩韻云云。史册必載之詳。姑錄其略。

林泉生

泉生。字清源。泉之永福人。天歷間。登進士第。官至翰林直學士。有覺是集。

弔岳王墓

誰收將骨葬西湖。已卜他年必沼吳。孤冢有人來下馬。六陵無樹可棲烏。廟堂短計慚嫠婦。宇宙惟公是丈夫。往事重觀如敗局。一龕燈火屬浮屠。

輟耕錄。最膾炙人口者。如高則誠。潘子素。林泉生云云。

何正

正。字守中。分水人。至順間。應薦。授山長。轉寧都下河巡檢。棄官。號雲壑道人。

春草

春來無處不芳菲。色透湘簾好染衣。南浦暝煙鳧鳥沒。曲江寒雨鷓鴣飛。高人有意憐新綠。游子無心戀



舊歸。淮海年年空人望。六朝王業竟成非。

月

宴罷瑤臺出禁遲。玉輪飛上已多時。一天星斗光芒後。萬里銀河影漸移。素女夜寒初倦舞。嫦娥秋老正含悲。黃沙磧裏涼如水。人在青樓有所思。

浙江通志初被薦時。試以春草月詩二首。人爭傳之。

黃鎮成

鎮成字元鎮。邵武人。至順間。屢薦不就。後政府奏授江西儒學副提舉。

句

王孫不歸怨芳草。山鬼欲啼牽女蘿。鐵檄召雷秋雨足。瑤壇謁帝夜雲高。游山採藥辭家早。掃石看雲出洞遲。青山盡處海門闊。紅日上來天宇低。花竹一家巢絕頂。煙塵九點認齊州。潮來估客船歸市。月上人家水浸空。

筆精。元季詞人輩出。而邵武有黃鎮成。詩多奇警。秋聲集十卷。佳句疊出。如云云。惜梨棗朽腐。少。有觀其全篇者。

陳楚春

楚春字若雷。臨武人。

句

紅日馬頭天已近。青雲雁背雨初晴。

萬歷湖廣總志。授長沙天臨路教授。庚申帝幼年。遠貶南服。至道州。春爲詩上之。有云云之句。庚申喜而諭之曰。此等老先生。宜大用之。乃居此職。及北還登極。以春充扈從官。至京。命題神州八景稱旨。遂擢拜湖南道廉訪使。不拜。以疾乞歸。

# 元詩紀事卷十八

迺賢

迺賢字易之。本葛邏祿氏。譯言馬也。南陽人。薦授翰林編修官。有金臺集。

王忠文公集。河朔訪古記二卷。合魯君易之所纂。予爲之序曰。合魯實葛邏祿。本西域名國。而易之先。由南陽遷浙東。易之少力學。工爲文辭。既壯。肆志遠游。乃絕淮入穎。經陳蔡以抵南陽。由南陽浮臨汝。而西至於洛陽。由洛陽過龍門。還許昌。而至於大梁。歷鄭衛趙魏中山之郊。而北達於幽燕。於是大河南北。古今帝王之都邑。足跡幾徧。凡河山城郭。宮室塔廟陵墓。殘碣斷碑。故基遺跡。所至必低徊訪問。或案諸圖牒。或訊諸父老。考其盛衰興廢之故。而見之於紀載。至於撫時觸物。悲喜感慨之意。則一皆形之於詠歌。既乃哀其所記載。及詠歌之什。以成此書。

## 穎州老翁歌

穎州老翁病且羸。蕭蕭短髮秋霜垂。手扶枯筇行復卻。探瓢勺食河之涓。我哀其貧爲顧問。欲語哽咽吞聲悲。自言城東昔大戶。腴田十頃桑陰闌。闔門老稚三百指。衣食儘足常懸錐。一作熙熙河南年來數亢旱。赤地千里黃塵飛。麥禾槁死粟不熟。長鑱挂壁犂生衣。黃堂太守足宴寢。鞭扑百姓窮膏脂。聒天絲竹夜酣飲。陽陽不問民嗷飢。巾中斗粟價十千。饑人煮蕨供晨炊。木皮剝盡草根死。妻子相對愁雙眉。鵠形累累口生皸。樹割餓莩無完肌。姦民乘隙作大盜。腰弓跨馬紛驅馳。嘯呼深林聚兇惡。狎弄劍槊搖旌旗。

去年三月入州治。踞坐堂上如熊羆。長官邀迎吏再拜。餽送牛酒羅階墀。城中豪家盡剽掠。况在邨落人煙稀。裂囊剖筐取金帛。煮雞殺狗施鞭笞。今年灾虐及陳顛。疫毒四起民流離。連邨比屋相枕藉。縱有藥石難扶治。一家十口不三日。藁束席卷埋荒陂。死生誰復顧骨肉。性命喘息懸毫釐。大孫十歲賣五千。小孫三歲投清漪。至今平政橋下水。燭髓白骨如山崖。繡衣使者肅風紀。下車訪察民瘡痍。綠章陳辭達九陛。徹樂減膳心憂危。朝堂雜議會元老。恤荒討賊勞深機。山東建節開大府。便宜斬磔揚天威。親軍四出賊奔潰。渠魁梟首乾坤夷。拜官納粟循舊典。戰士踴躍皆歡怡。淮南私廩久紅腐。轉輸豈惜千金資。遣官巡行勤撫慰。賑粟給幣蘇民疲。獲存衰朽見今日。病骨尙爾難撐持。嚮非聖人念赤子。填委溝壑應無疑。老翁仰天淚如雨。我亦感激愁歔歎。安得四海康且阜。五風十雨斯應期。長官廉平縣令好。生民擊壤歌清時。願言觀風采詩者。慎勿廢我潁州老翁哀苦辭。

金臺集。狀物寫景之工。固詩家之極致。而繫於風化。補於政治。尤作者之至言。易之此詩。兼得之矣。禮部侍郎汝陰李黼子威書。易之此詩。格調則宗韓吏部。性情則同元道州。必有能知之者。監察御史太僕危素書。至正四年。河南北大饑。明年又疫。民之死者過半。期廷嘗議鬻爵以賑之。江淮富人應命者衆。凡得鈔十餘萬定。粟稱是。會夏小稔。賑事遂已。然民罹大困。田萊盡荒。蒿蓬沒人。狐兔之跡滿道。時余爲御史。行河之南。請以富人所入錢粟。貸民具牛種以耕。豐年則收其本。不報。覽易之之詩。追憶往事。爲之惻然。八年三月。翰林待制武威余闕志。

三月京城寒悄悄。燕子初來怯清曉。河隄柳弱冰未消。牆角杏花紅萼小。主家簾幕重重垂。銜芹卻向一作傍檐間飛。托巢未穩井桐一作梧墜。翩翩又向天南歸。君不見舊時王謝多樓閣。青瑣無塵卷珠箔。海棠花外春雨晴。芙蓉葉上秋霜薄。

金臺集自注。京城燕子三月盡方至。甫立秋卽去。有感而作。

巢湖述懷寄四明張子益

憶昔移家東海上。萬斛龍驤跨鯨浪。三神宮闕渺何許。弱水茫茫空悵望。前年去作燕山遊。羸躄短褐風颼颼。昭王臺前月似水。荆卿驛畔天如秋。病骨苦寒情苦倦。南下瀆河疾於箭。清晨雙櫓發呂梁。黃昏已泊桃源縣。生來每歎蜀道難。去年我亦登蒼山。馮公嶺頭日不到。肩輿履雪梯孱顏。僕夫緣崖如凍蟻。下類罈山深澗底。人家半出松樹頂。白雲卻向山腰起。今年四月江西歸。小姑正對彭郎磯。三更掛帆海門過。一川草樹浮晴暉。我生胡爲自役役。孟浪江湖竟何益。清霜鏡底縈鬢絲。坐對篝燈空嘆息。愁來鬱鬱不可當。結交賴有張家郎。臨風同歌紫芝曲。掃石大醉黃金觴。我家南陽天萬里。十年不歸似江水。秋來忽作故鄉思。裹劍囊衣渡揚子。玩鞭亭下江縈紆。淮山楚樹青扶疎。一帆西風出巢縣。眼明墮此清冰壺。湖水漫漫接天杪。天底更覺青山小。倦飛沙鳥戛漁艇。倒影芙蓉涵碧藻。涼波不動舟如飛。櫂歌官官聲相隨。江東雲樹轉頭失。淮西山水尤清奇。故人江南不可見。千里相忠情眷戀。門外梅花知未發。屋頭柿葉題應徧。期君不來爭奈何。青天落日搖滄波。明年歸來賀山下。與君共讀巢湖歌。

金臺集。易之詩中所歷之景。予皆嘗過之。所未至者巢湖耳。易之有此清雄俊拔之句。予無一語

者。人各有能有不能也。太常博士危素書。

新鄉媪

蓬頭赤腳新鄉媪。青裙百結邨中老。日間炊黍餉夫耕。夜紡棉花到天曉。棉花織布供軍錢。借人輻轂輸公田。縣裏公人要供給。布衫剝去遭笞鞭。兩兒不歸又三月。祇愁凍餓衣裳裂。大兒運木起官府。小兒擔土填河決。茅欄雨雪燈半昏。豪家索債頻敲門。囊中無錢甕無粟。眼前只有扶牀孫。明朝領孫入城賣。可憐索價傍人怪。骨肉分離豈足論。且圖償卻門前債。數來三日當大年。阿婆墳上無紙錢。涼漿澆溼墳前草。低頭痛哭聲連天。恨聲不作三韓女。車載金珠爭奪取。銀鐺燒酒玉杯飲。絲竹高堂夜歌舞。黃金絡臂珠滿頭。翠雲繡出鴛鴦稠。醉呼閹奴解羅慢。牀前爇火添香篝。

金臺集右新鄉媪一首。余同年塢海仲良宜慰君之仲氏。迺賢易之之所作也。其詞質而婉。豐而不浮。其旨蓋將歸於諷諫云爾。昔唐白居易爲樂府百餘篇。以規諷時政。流聞禁中。卽日擢爲翰林學士。易之他詩。若西曹郎穎州老翁等篇。其關於政治。視居易可以無媿。而藻繪之工。殆過之矣。況今天子聖明。求言之酷。播在天下。當此之時。易之之詩。或經乙夜之覽。則其眷遇。又豈下於居易哉。故余三復之餘。謹識其後。以俟南臺中執法。濮陽蓋苗耘夫。書於京師寓舍。

金臺集楊彝跋。余謂易之之詩。如穎州老翁。西曹郎。巢湖新鄉媪。新隄等篇。撫事感懷。若不經意。而盡所欲言。有得於風人之旨者。當不謝於古人。況其所工者。復不下是。茲固可信其必傳也。

鈞州陽翟縣南有山曰三峯。昔我睿宗在邸，嘗統兵伐金，與其三將完顏合達、移刺蒲兀、完顏斜烈等慶戰山下，敗其軍三十萬，而金亡矣。今百餘年，樵牧往往于沙磧中，得斷稍遺鏃印章之類。至正五年嘉平第二日，予曰：鄰城將上京師，道出陽翟，夜宿中書郎郭君彥通私館，感父老之旨，而作歌曰。

落日慘淡黃雲低，懸崖古樹攢幽溪。三峯山頭獨長嘯，立馬四顧風淒淒。溝邊老翁行偃僂，勸我停驂爲君語。山前今日耕種場，誰識當年戰爭苦。金源昔在貞祐閒，邊塵四起民彫殘。燕京旣失汴京破，區區恃此爲河山。大元太子神且武，萬里長驅若風雨。慶兵大雪三將死，流血成河骨成堵。朱鸞應瑞黃河清，金將亡，新鄉河清鼓山鳳出，應國朝開基之兆。聖人啓運乾坤寧，當時流離別鄉井，歸來白髮歌承平。曠野天寒霜簌簌，夜靜愁聞山鬼哭。至今壘上牧羊兒，猶向草根尋斷鏃。論功衛霍名先收，黃金鑄印身封侯。英雄半死鋒鏑下，何爲酌酒澆荒丘。

金臺集：余比修國史，睹三峯之役，金師三十五萬來拒戰，我師不敵，軍於山之金溝，其軍數重圍三峯，而中夜大雪，金人戈戟弓矢凍糲，莫能施。我師一鼓殲之，自是金人膽落，不復戰矣。易之作歌辭，豪健激昂，而奕奕有思致，殆與三峯長雄置之樂府，饒歌閒揚厲無前之盛績，良無媿也。晉寧張翥題。

汝水

騎馬涉秋水，泠泠戰骨聲。寒沙沈斷戟，殺氣暗殘營。自欲全忠義，誰能顧死生。千年董狐筆，端不媿田橫。

金臺集自注。天兵與宋合攻蔡州。城既破。金右丞完顏仲德率將士六百人突圍遁至汝水。回顧城中煙焰張天。仲德下馬謂將士曰。國已亡。余居宗室。且備位宰相。義固當死。諸公宜早降。諸將大譟曰。相公能死。吾輩獨不能死耶。六百人皆奮然赴汝水以死。

塞上曲

雙鬢小女玉娟娟。自卷氈簾出帳前。忽見一枝長十八。折來簪在帽簷邊。

金臺集原注。長十八。草花名。

南城咏古十六首并序

至正十一年八月既望。太史宇文公。太常危公。偕燕人梁處士九思。臨川黃君殷士。四明道士王虛齋。新進士朱夢炎。與余凡七人。聯轡出遊燕城。覽故宮之遺跡。凡其城中塢廟樓觀。臺榭園亭。莫不徘徊瞻眺。拭其殘碑斷柱。爲之一讀。指廢興而論之。余七人者。以爲人生出處聚散。不可常也。解后一日之樂。有足惜者。豈獨感慨陳迹而已哉。各賦詩十有六首。以紀其事。庶來者有所徵焉。河朔外史迺賢序。

黃金臺

落日燕城下。高臺草樹秋。千金何足惜。一士固難求。滄海誰青眼。空山盡白頭。還憐易河水。今古只東流。

憫忠閣

金臺集自注。大悲閣東南。隗臺坊內。



高閣秋天近。金仙寶珞齊。青山排闥見。紫氣隔城迷。朱栱浮雲濕。瑤檐落照低。因懷百戰士。惆悵立層梯。  
自注。唐太宗憫征遼士卒陣亡而建。

壽安殿

夢斷朝元閣。來尋賣酒樓。野花迷輦路。落葉滿宮溝。風雨青城莫。河山紫塞愁。老人頭雪白。扶杖話幽州。  
自注。殿基今爲酒家壽安樓。

聖安寺

蘭若城幽處。聯鑪八月來。寶華幢蓋合。袞冕畫圖開。斷碣蒼苔暗。空庭落葉堆。飢鷹不避客。攫食下生臺。  
自注。寺有金世宗章宗二朝象。

大悲閣

閣道連天起。丹青飾井幹。如何千手眼。只著一衣冠。金榜文龍挾。瑤蕤吻獸攢。憑高天萬里。白紵不勝寒。  
自注。閣榜虞世南書。

鐵牛廟

燕人重東作。鎔鐵象牛形。角斷苔花碧。蹄穿土鏽腥。遺蹤傳野老。古廟託山靈。一酌壺中酒。穰穰黍麥青。  
雲仙臺

臺殿青冥外。闌闌海月涼。隔簾聞鳳管。秉燭奏一作按霓裳。銅雀晨霞眩。金盤夕露瀼。仙人不復返。愁殺海生桑。

自注。今之望月臺。

長春宮

羸驂。蹋秋日。一作水。迢遞。謁琳宮。松子花。飄落。溪流板閣通。樓臺非下土。環珮憶高風。草昧艱難日。神仙第一功。

自注。全真丘神仙處機之居。大祖常召至西域之雪山誦道。屢勸上以不殺。

竹林寺

城南天尺五。祇樹給孤園。甲第王侯去。精藍帝釋尊。老僧誇塔影。稚子斲松根。何日天台路。相從一問源。

自注。金熙宗駙馬宮也。寺僧云。一塔無影。

龍頭觀

仙館紅塵外。龍頭得借看。開函雲氣溼。近席雨聲寒。碧血凝螺黛。香涎遍麝檀。牙籤認題字。猶是建隆元。

妝臺

廢苑鷺花盡。荒臺燕麥生。韶華如逝水。粉黛憶傾城。野菊金鈿小。秋潭石鏡清。誰憐舊時月。曾向日邊明。

自注。李妃所築。今在昭明觀後。妃常與章宗露坐。上曰。二人臺上坐。妃應聲曰。一月日邊明。上大悅。

雙塔

安史開元日。千金構塔基。世尊寧安福。天道自無私。寶鐸游絲冑。銅輪碧薜滋。停驂指遺跡。含憤立多時。  
自注。安祿山。史思明所建。在憫忠寺前。

西華潭

秋水清無底。涼風起綠波。錦帆非昨夢。玉樹憶清歌。帝子吹笙絕。漁郎把釣多。磯頭浣紗女。猶恐是宮娥。  
自注。金之太液池。

白馬廟

祠宇當城角。霜蹶刻畫真。房星何日墜。駿骨自能神。曾蹴陰山雪。思清瀚海塵。長疑化龍去。騰蹋上雲津。  
萬壽寺

皇唐開寶構。歷劫抵金時。絕妙青松障。清涼白玉池。長廊秋屨響。高閣夜鐘遲。獨有乘閑客。扶藜讀舊碑。  
自注。寺有許道寧畫屏。

玉虛宮

樓觀迴深巷。松枝夾路低。拾薪供早爨。抱甕灌春畦。經向琅函讀。詩從古鼎題。白鬚張道士。送客過桃溪。  
自注。太道教以供薪水之勞。爲其張本。宮主張真人。其貌甚清古。

題汪水雲詩後

三月錢塘海不波。子嬰繫組納山河。兵臨魯國猶弦誦。客過商墟獨嘯歌。鐵馬渡江功赫奕。銅人辭漢淚滂沱。知章喜得黃冠賜。野水閒雲一釣簑。

歸田詩話。元量有詩一帙。皆敘亡宋事。可備野史。元馬易之題其帙後云云。

余闕

闕。字廷心。唐兀氏。世居武威。父官合肥。徙家焉。登元統癸酉進士第。官至淮南行省左丞。陳友諒來攻。城陷。死之。諡忠宣。有青陽集。

戴九靈集。論者謂馬公之詩似商隱。薩公之詩似長吉。而余公之詩。則與陰鏗何遜。齊驅而並駕。案馬。馬祖常。薩。薩都刺。

八月十五夜處州分司對月

玄武夕始正。華月升秋旻。徘徊出西陸。照曜此甌閩。金波何穩穩。綠枝滿中輪。餘輝動軒房。紫蘭含微津。皇天降豐歲。王政亦已陳。樂哉一杯酒。允矣同庶人。

草木子。浙東僉憲余闕。案吾郡時。中秋夜望月。嘗作一詩。題於分司官舍云云。此詞清婉。藹然有與民同樂之意。後爲淮西宣慰。守安慶孤城六年。上下援絕。淮寇益熾。城遂陷。府前有大池。自刎死於池。妻子亦同死。贈淮南行省右丞。進平章事。諡文貞公。

案青陽集。首韻升作生。次韻乃金波云云。枝作桂。三韻乃徘徊云云。四韻光流河宿隱。氣隨商律振。草木子無餘均同。惟豐作嘉。杯作卮。

句

野人籬落通潛口。賈客帆檣出漢陽。詳趙孟頫下。

李祁

祁字一初。號希遠。茶陵州人。登元統元年進士第。官至浙江儒學副提舉。有雲陽集。

昭君出塞圖

朔風吹沙天冥冥。愁雲壓塞邊風腥。胡兒執麾背人立。傳道單于令行急。蒙茸胡帽貂鼠裘。誰信宮袍淚痕濕。漢家恩深幸不早。此身終向胡中老。此身儻負漢宮恩。殺盡青草原上草。

懷麓堂集。族高祖希遠先生。當元季之亂。慨然欲效一障以死。而不可得。又以爲委質事人。不可終負。蓋見諸明妃詩。及青陽集序。自以不得如廷心爲恨也。

和王子讓

老淚縱橫憶舊京。夢中歧路欠分明。天涯自信甘流落。海內誰堪托死生。短策未容還故里。片帆直欲駕滄瀛。他年便作芙蓉主。慚愧當時石曼卿。

句

諸葛有才終復漢。管寧無計漫依遼。

麓堂詩話。族祖雲陽先生以詩名。其和王子讓云云。此洪武初寓永新時作也。他詩如云云。皆清激悲壯。可詠可歌。元詩體要乃獨取五言二絕。蓋未見其全集也。

題畫二絕

浩浩滄波天四圍。秋風一鶴夜來歸。祇應夢裏聞長笛。知是年時舊羽衣。

町畦高下水漫漫。痛惜辛勤學種田。便擬明朝精長網。與翁同住浙江邊。

雲陽集跋。右絕詩二章。茶陵李先生墨迹。先生退隱永新山中。絕意仕進。二絕必其與同志者。否則寓言耳。前以鶴歸爲況。後以耕漁爲事。其高尙貞一之概。確然有不可拔者。於是乎概見矣。後學安成彭華識。

奉題朱澤民先生畫山水圖

洞庭之南湘水東。青山奕奕蟠蒼龍。雲陽峰高七十一。欲與衡岳爭爲雄。我家近在雲陽下。來往看山如看畫。十年塵土走西風。每憶雲陽動悲咤。吳中勝士朱隱君。筆精墨妙天下聞。畫圖畫出湘江水。青山上。有雲陽雲。雲陽山高湘水綠。十年不見勞心目。只今看畫似看山。萬里歸情寄鴻鵠。

長洲吳寬跋。崑山許氏藏元人墨跡數紙。中有茶陵李公一初題朱澤民山水詩一首。公爲賓之學士之族高祖。爲乞而歸之賓之。賓之遂加袂飾。俾予書其所來。宏治戊申冬十月。長洲吳寬書。晉陵陸簡跋。賓之學士得其先世一初提舉手墨一紙於原博所。意謂安得朱畫以成二美。予時偶收此幅。遂以歸之。裝潢爲一俾識所自。夫詩圖淪落海內百餘年。復還其嗣人之手。亦奇矣。澤民亦嘗爲儒學提舉。今詩稱隱君。當是未仕時筆。公隱永新山中三十年。而詩有風塵之歎。豈其供奉翰林。及出爲提舉時耶。公著有希蘧集。惜此詩散逸不收。

五世諸孫東陽跋。希蘧府君題朱澤民山水畫長句真蹟。有姓名及字印各一。而無畫。許紳鴻高所藏鉅卷。皆元諸賢詩翰。此其一也。原博先生見而說之曰。此在汝卷。不過三十之一。無不爲闕。

在其子孫。則千金之寶也。子何惜三十之一。以爲千金之饋乎。他日以諾告。且曰。爲我作海月菴記。即可致矣。記成而詩果至。又數日。陸先生廉伯。以澤民畫一軸爲贈。上有空楮。取其詩校之。不爽分寸。卽標於其上。觀者不能辨爲二物。雖府君有靈。不能不爲慨然。況爲之子孫者哉。

### 歸來軒

忙處愛山看不當。歸來結屋長相向。就中編作歸來軒。田園正欠陶元亮。竹籬茅舍村數家。藜杖芒鞋時一訪。紅塵不比晉宋閒。清風自是羲皇上。夢回枕簟書有聲。客來午篆微煙障。綠陰入戶如有約。白雲出谷遙相望。邈知今日始有歸。始信從前心是放。更容老子二十年。從教白髮三千丈。

雲陽集諸孫東陽記。族祖一初先生。至正壬辰。兵變流落江南。弗克寧家。洪武元年。歸來賦此。

### 王禮

禮字子讓。

### 句

當戶雨苔雙石峻。隔江煙樹數峯間。杖藜麥壟秋霜後。樽酒茅堂夕照閒。閒有古書人不見。柴門客去又常關。

麟原集。劉定之序。昔元盛際。專假科舉。抑南士。南士多伏處。用詩文自寫。至是與子讓希。蘧山立輩。往還邱壑。山立有詩題子讓所居者。予已首聯其下云云。觀是子讓甘寂淡。樂幽僻。託耕鑿。以棲迹於運去物改之餘。依麴蘖以逃名於頭童齒豁之際。無求於今。有期於古。可見也。

宇文公諒

公諒字子貞京兆人元統元年登第官至嶺南廉訪司僉事

西湖竹枝詞

蘇小門前騎馬過相逢白髮老宮娥自言記得前朝事只說當年賈八哥

西湖竹枝集詩文尙理趣歌是詩者知其人矣

案純節先生集此詩作湖裏菱青日日多蘇小門前無客過今來古往只如此休說當年賈八哥

蔡廷秀

廷秀字君美松江人官袁州推官斬寇起被執死之

句

旌旗小小將軍隊行李蕭蕭郎能船一水白隨鷗鷺去萬山青逐虎龍眠

梧溪集尤好詩送閩人之巡檢云云袁州宜春臺云云至今傳誦

李介石

介石字守道丹邱人授松江府提控按犢從守鎮江鎮江失守不屈死

西湖竹枝詞

春暉堂上挽郎衣別郎問郎何處歸黃金臺高倘回首南高峯頂白雲飛

西湖竹枝集好學工詩有志於儒者也竹枝一詞不以私語而託以愛親之意亦足裨風教云



樊執敬

執敬字時中。鄆城人。至正間。官至浙江行省參知政事。賊犯餘杭。戰死。追封魯國公。七修類稿。徐壽輝自徽犯浙西。公禦賊於天水橋。巷戰死。其妻與子溺於西湖。杭人立祠祭焉。楊鐵崖爲文紀之。

觀潮題樟亭

煙波閃閃海門開。平地潛生萬壑雷。大信不虧天不老。浙江亭上看潮來。

霏雪錄。樊公時中爲浙江參政。觀潮。嘗題詩樟亭云云。公之志可見矣。至正壬辰。紅巾賊亂。公張弓抽矢。馳射於其間。賊應弦而斃者甚衆。自卯至申。公矢盡。竟死之。

石抹宜孫

宜孫字申之。其先遼之迪烈紮人。官至江浙行省參知政事。亂起。被害於處州。諡忠敏。

妙成觀掀篷和何宗姚韻

結構新亭似勝前。登臨歷歷瞰晴川。放懷喜解防秋戍。乘興還操下瀨船。從此入林堪避地。何妨坐井亦觀天。東風回首春城暮。桃李依然種日邊。

元詩癸集。在處州時。用劉基。胡深。葉琛。章溢諸人居幕府。自引諸名士。投壺賦詩。嘗構掀篷于妙成觀。何宗姚首唱。一時和者數十人。

黃復圭

復圭字君瑞安仁人。至正兵起陷賊。作詩大罵被害。

句

隱士高閒臥雲處。故家軒豁讀書齋。冉冉霜顛倚門處。飄飄風袂及家時。菡萏泉香金錯落。芡芻風煖翠婆娑。

元詩選如題詹雙崖云云。題唐氏遊子遠歸圖云云。題古厓上人云云。鐵心石腸人。偏解吐婉媚辭也。

魯至道

至道字□□□□人。至正間任潭州路總管。

挽樊時中參政

主將無謀佛乘情。賢參有志惜言輕。狐羣衝突成妖孽。黔首驚惶望太平。舊志從軍全節義。殺身殉國顯忠誠。歲寒橋下清冷水。夜夜空聞哽咽聲。

挽寶哥參政

香魂俊骨墜深淵。無智無謀亦可憐。妖寇猖狂如有祟。生民凋瘵似無天。芳名苟得千年在。死節應當二日先。欲向西湖酌尊酒。淒風冷雨浪無邊。

山居新話。至正十二年壬辰七月初十日。徽賊入寇杭城。樊時中執敬爲浙省參政。亟出禦賊。北行至歲寒橋遇害。先浙省以杭州路總管寶哥惟賢攝參政。調守禦崑山之太倉。領軍而往。駐於

崑山舊州山寺。離太倉州治三十餘里。終於不往。聞寇至。遂遁匿於杭之寓舍。適值賊破杭。乃挈家潛於西湖舟中。越三日。鄰居無賴之徒。利其所將。恐之。遂與次妻□氏。連結其衣袂。溺水而死。時潭州路總管魯至道。作二詩挽之。以寓褒貶之意。

### 陳柏

柏。字新甫。號雲嶠。泗州人。嘗爲侍儀舍人。後官至太祝。

輟耕錄。陳雲嶠。性豪宕。結客。嘗被命監鑄祭器於杭。無錫倪元鎮慕其名。來見之。張宴湖山間。羅設甚至。酒終爲別。以一帖餽米百石。柏命從者移置近所。舉觥引妓樂。驕從者而前。悉分散之。顧倪曰。吾在京時。卽熟爾名。云南士之清者。他無與比。其所以章章者。蓋以米沾之也。請從今日絕交。時張伯雨在坐。不勝跼蹐。其豪氣類如此。

山居新話。陳雲嶠。陳平章之孫也。倜儻不羈。人以陳顛稱之。後至元五年。爲餘姚州同知。因病求醫於杭。稍愈。值重陽日。遂邀張伯雨及余同登高。時雲嶠寓赤山李叔固丞相先塋。余二人往焉。乃扶杖游水樂洞。憩石屋寺前。露坐閒談。雲嶠因自言曰。我前身僧也。泗州塔寺有住持者。皆名之爲老佛。齋戒精嚴。一日呼侍者。令作血臟羹。欲食之。侍者曰。老佛一世持齋。何故有此想。乃不從。遂怒之。拂袖而去。見陳平章曰。我特來索血臟羹喫。平章亦以齋戒爲答。佛曰。元來你也是不了事漢。平章遂作此羹噉之。卽歸寺。乃別大衆而作偈曰。撞開平屋三層土。踏破長淮一片冰。遂趺坐而逝。茶毗之日。昇其龜至淮河岸。冰合已久。舉火之次。忽大響一聲。則河冰自裂。時平章在

府中見老佛入於堂。問之。則後堂報生一子。卽某也。言畢。回飲於寓所而散。明日伯雨送登高詩。而頸聯有百年身付黃花酒。萬壑松如赤腳冰之句。余和韻云。方外弟兄存晚節。人間富貴似春冰。雲嶠曰。我無冰字。且只以長淮一片冰答之。不數日。雲嶠告歿。豈非說破話頭而致然也。

雪中騎牛拜米南宮墓

少年不解事。買駿輕千金。何如小黃犢。踏雪空山深。小小雙牧童。吹笛穿松林。醉拜南宮墓。地下有知音。輟耕錄。嘗雪中騎牛拜米南宮墓詩云云。言世上無知音也。平日喜居錢塘。好古有餘。而治才不足。又不樂小官。怒罵宰相。年逾六十。不得志而死。其畢命時作偈云。前身本是泗州僧。

方瀾

瀾。字叔淵。莆陽人。後至元時布衣。

句

以詩爲佛事。隨地學山居。煖容時借酒。寒力曉欺綿。萬事集雙鬢。百年堪幾愁。江流拍岸闊。海氣入城涼。疎鐘出煙寺。新月入人家。

蘭陔詩話。叔淵流寓吳門。授徒自給。少年不娶。人比之林和靖。其集中如詠樂天云云。臨平道中云云。夜雨云云。錢塘紀事云云。秋夕云云。皆佳句。

濮彥仁

彥仁。字仲溫。桐鄉人。至元中官吳中。棄職歸。

句

丈人夜開關。涼月在松頂。

桐溪詩述。關松月寮。以爲吟嘯之所。有云云之句。遂以松月道人自號。楊維禎爲之記。

朱守諒

秋夜偶成錄一

兩園江水薄城闈。地僻民稀俗化醇。暫止熊羆消大暑。秋深雲合殄妖氛。

湖南通志詩云。近因洞賊作耗。奉命分省剿捕。自辰沅東下至黔陽。時維大暑。軍卒疫痢。故暫憩是邑。秋夜偶成七言六絕。以俟同志諸君一笑云。至正八年歲次戊子。秋七月中旬。朝散大夫湖廣等處行中書省左右司員外郎朱守諒題。右刻正書念三行。在黔陽縣學。

黃德廣

德廣字□□。鄞人。

扇上詩

東風一曲浣溪紗。客子行吟對日斜。猶記金陵貰春酒。小姬能唱後庭花。

歸田詩話。至正初入大都求仕。交游竟無一援引之者。客居以教書爲生。二十年餘。始附海舟而歸。子從先師往訪之。見其所持扇上一詩。乃在北日所著詩云云。亦醞藉可誦。而命運不遇如此。

申屠駟

駟字子迪。

道山亭聯句首聯

追陪偶上道山亭。疊障層巒繞郭青。

僧家奴

僧家奴字元卿。

次聯

萬井人家鋪地錦。九衢樓閣畫幃屏。

三聯

波搖海日添詩興。座引天風吹酒醒。赫德爾已見

奧魯赤

奧魯赤字文卿。

結聯

久立危欄須北望。無邊秋色杳冥冥。

烏石山志。石刻追陪云云。子迪。萬井云云。元卿。波搖云云。本初。久立云云。文卿。右憲使嶂山。僧家奴。元卿公。僉憲奧魯赤。文卿公。中屠駟。子迪公。赫德爾。本初公。暇日燕集。聯句也。譚忝備憲幕。重惟諸公。皆文章名士。南北隔數千里。同仕於閩。文字爲娛。誠一時之嘉會。因勒巖石。以紀我元文物之盛云。至正九年八月望日。經歷趙諱識。

# 元詩紀事卷十九

錢惟善

惟善字思復錢塘人。領至正辛巳鄉薦。官至副提舉。有江月松風集。

南濠詩話。錢思復嘗赴浙江省鄉試。時出浙江潮賦。三千人中。皆不知錢塘江爲曲江。思復獨用之。蓋出枚乘七發。考官得其卷大喜。寘於前列。思復歸。乃構曲江草堂。暮年自稱曰曲江老人。詩談。錢惟善鍾湖山之秀。而發於詩。故多秀句。

江月松風集序。錢思復所作特妙。未嘗不議論。而不宋於議論。未嘗不景物。而不晚唐四靈於景物。亦浣花溪上。見白頭亂髮兩耳人耶。

西湖竹枝詞

阿姨住近段家橋。山妬蛾眉柳妬腰。黃龍洞前黑雲起。早回家去怕風潮。

歸田詩話。錢思復以浙江潮賦得名。起句云。維羅刹之巨江兮。實發源於太末。試官喜之。遂中選。蓋滿場無知羅刹爲浙江別號者。復作西湖竹枝曲云云。先伯元範戲之云。此段家橋創見。卻與羅刹江不同也。蓋西湖斷橋。以唐人詩斷橋芳草合得名。亦謂孤山路至此而盡。非有所謂段家者。

句

笠澤水寒魚尾赤。洞庭霜落樹頭紅。漢史丁公那及齒陶詩甲子不書元。

歸田詩話。思復號心白道人。張氏據吳。遂不仕。退居吳江筒川。與楊廉夫唱和。有句云云。蓋感時事也。

又

生前母應金錢夢。死後人稱鐵笛仙。

雪霏錄。楊廉夫先生之母夫人。嘗夢神人授金錢一枚。遂娠先生。先生卒。錢君思復作挽詩云云。

盧琦

琦字希韓。惠安人。登至正二年進士第。官至永春縣尹。調寧德。

句

嵐氣滿林晴亦雨。溪聲近驛夜如秋。潮生遠浦孤帆小。雨過蒼崖古木寒。小橋跨澗村春急。老樹吹花野店香。暮雲松徑僧歸寺。夜雨蓬窗客在船。門掩落花春去後。夢回殘月酒醒時。梧葉幾番深夜雨。梅花一樹短籬霜。

筆精。盧圭齋所著。有圭齋詩集。歲久弗傳。近惠安莊戶部徵甫蒐而梓之。誤入雁門薩天錫詩六十餘首。薩詩世有傳本。校者一時未之考耳。亟當釐正。不然恐以圭齋爲齊邱之盜化書也。盧詩自佳。如云云。清典可詠。元詩多纖弱。若圭齋者。實有唐調者也。

孔鏡



皖字子充。至正壬午鄉貢。授宗文書院山長。官至照磨。

亂後

故居燒後拾殘編。留得陶詩一兩篇。彭澤豈堪猶作令。義熙何忍再書年。

浙江通志。山長秩滿歸。隱居養親。有經略使至。延見。上政略五篇。言天下利害。使嘉納之。授浙閩照磨使。輔周嗣德守禦。元亡。不復仕。有詩云云。

李孝光

孝光字季和。温州樂清人。至正初。官祕書監丞卒。

詩藪。李孝光古詩歌行。豪邁奇逸。如驚蛇跳駿。不避危險。當時語云。前有虞范。後有李楊。謂廉夫也。

箕山操和鐵雅先生首唱。一作爲許生作。

箕山之陽兮。其木樛樛。箕之冢兮。白雲幽幽。乾坤漚氣作箕之冢兮。白雲悠悠。箕之陽兮。其木樛樛。彼一作夫。世之人兮。孰能遺我以憂。雖欲從我一無我字。兮。其路無由。朝有人兮。來飲其牛。

大雅集。鐵雅評曰。善作琴操。然後能作古樂府。和余操者。李季和爲最。其次夏大志也。

太乙真人歌題蓮舟圖

銀河跨西海。秋至天爲白。一片玉夫容。洗出明月魄。太乙真人挾兩龍。脫巾大笑眠其中。鳳麟洲西與天通。扶桑乃在碧海東。手把白一作綠。雲有兩童。掣鬪二鳥開金籠。

大雅集鐵雅評曰。此作乃是李騎鯨也。孰謂此老椎鈍無爽氣邪。二鳥作日月看。

送僧朴菴用柯敬仲韻

月行天中央。天高如屋極。中有雪色兔。下土人不識。我曾摩其頂。仙吏睨我側。世人乞毫光。密如霧雨塞。蹴踏河漢搖。洶湧若秋汐。是誰知此奇。南有彌天釋。去不復念。令人淚橫臆。

梧溪集僧惇朴菴黃巖人。壯游金陵。與五峯李孝光並受知。梁王一日公引柯九思見。柯以寫竹遂觀幸。王卽位。獨召用柯。李後送公詩云云。若不能無慨者。

大星

大星在天小星落。城頭烏烏吹畫角。津吏擊鼓河上船。行人草草居人憐。男兒墮地弧矢願。南北東西君莫怨。

詩藪雄渾流麗步驟中程。

張翥

翥字仲舉。晉寧人。至正初。召爲國子助教。官至翰林學士承旨。有蛻菴集。

歸田詩話。至正初。爲集慶路學訓導。御史下學。點視廩膳。鄰齋出對云。豸冠點饌。是日適用驢肉。仲舉戲續云。驢肉作羹。御史聞之大怒。欲逮捕之。仲舉乘夜逃奔揚州。

西湖游覽志。張仲舉翥。其先晉寧人。父爲杭州鈔庫副使。因家焉。翥少時豪放不羈。好蹴鞠。喜音樂。父憂之一旦。翻然易轍。閉戶讀書。從仇仁近學。以詩文名海內。

寄浙省參政周玉坡

天子臨軒授鉞頻。東南無地不紅巾。鐵衣遠道三軍老。白骨中原萬鬼新。義士精靈虹貫日。仙家談笑海揚塵。都將兩眼淒涼淚。哭盡平生幾故人。

輟耕錄。此至正辛丑間。張蛻菴承旨。在都下寄浙省周玉坡參政詩也。夫翰苑詞臣。而寓言如此。則感時之意。從可知矣。

西湖冰合

西湖雪厚冰徹底。行人徑度如長川。風吹鹽池結陰鹵。日射玉田生暖煙。魚龍穴裏寒更縮。鷗鷺沙頭饑可憐。安得長冰通滄海。我欲三島求神仙。

委巷叢談。元至正間。西湖冰合。故老云。六十年前。曾有此異。張仲舉賦詩云云。

螢苑曲

楊花吹春一千里。獸艦如雲錦帆起。咸洛山河真帝都。君王自愛揚州苑。軍裝小隊皆美人。畫龍韞汗金麒麟。香風搖蕩夜遊處。二十四橋珠翠塵。騎行不用燒紅燭。萬點飛螢炫川谷。金釵歌度苑中來。寶帳香迷樓上宿。醉魂貪作花月荒。肯信戰劍生宮牆。爛斑六合洗秋露。尙疑怨血凝晶光。至今落日行人路。鬼火狐鳴隔煙樹。腐草無情亦有情。年年爲照雷塘墓。

詩藪。雄渾流麗。步驟中程。

登金山吞海亭了公請賦

危亭突兀載鼉頭。俯視滄溟一勺浮。龍伯衣冠藏下府。梵王臺殿起中流。扶桑夜色三山日。灑灑江聲萬里秋。老我惜無吞海句。但磨崖石記曾遊。

賦中書左曹小瀛洲

東曹地迴集名郎。宛是仙家紫翠房。閭闔上通天只尺。蓬萊移出海中央。金波日煖浮鳩鵲。玉樹春濃下鳳凰。幾度夢回清夜直。此身如在五雲鄉。

詩藪全篇整麗首尾勻和

七月廿九日

此醜今方殛。京城蹀血新。也知天悔禍。誰謂國無人。勝氣騰龍虎。沈機動鬼神。大庭親命詔。終夜在延春。元詩選。此詩爲李羅帖木兒作。李羅之入京師。使仲舉草詔不從。嘗作自誓詩曰。此醜行當殛。吾身敢顧危。要看奪笏處。正是結纓時。萬古千秋在。皇天后土知。寸心三尺簡。肯愧史卑詞。與此詩是一時作也。

挽忠襄王

聖主中興大業難。元戎報國寸心丹。軍中諸將驚韓信。天下蒼生望謝安。羽檄北來兵氣肅。樓船南下海波寒。老臣擬直詞林筆。細傳成功後代看。

元詩選。忠襄王謂察罕帖木兒也。察罕起兵沈丘。悉平河南山東諸處紅巾。至正壬寅。爲田豐王士誠所刺。先是有白氣如索。起危宿。貫太微垣。太史奏山東當大水。順帝曰。不然。山東必失一良

將卽馳詔戒察罕勿輕舉未至而已及難矣。

句

舊河通瓠子。新浪漲桃花。

詩藪云云。張仲舉詩也。李于鱗一聯云。春流無恙桃花水。秋色依然瓠子宮。實用張語。而意稍不同。

又

半生懸馨室。萬事缺壺歌。積陰霾日月。愁色滿江湖。露花迎夕斂。風樹借秋涼。寧爲伏劍死。不作倒戈攻。四郊多壁壘。萬里半煙塵。詞人歌蟋蟀。軍士歎蟪蛄。龍伯衣冠藏下府。梵王臺殿起中流。露下遠山皆落木。風來滄海欲生潮。千嶂晚雲原上合。兩河秋色雁邊來。雲移雁影沈江樹。雨帶龍腥出海濤。方驚掘地雙鵝起。卽見浮江五馬來。金波夜永浮鷓鴣。玉樹香濃下鳳凰。詳傳若金下。

成廷珪

廷珪字原常。蕪城人。有居竹軒集。

居竹軒詩集。邵肅序。嚮在揚州。識成君原常。雖居於市廛。而植竹庭院閒。綽有山林意趣。扁其燕息之所曰居竹。其交遊則仲舉張公爲忘年友。故其詩之音律體製。蓋有得於仲舉者多焉。居竹軒詩集。張彞序。余在廣陵時。嘗與君游乎山僧野士之寓。或臨大江。眺羣峯。或升蜀岡。坐茂樹。未嘗不詩。是作也。其或風日之朝。燈火之夕。樽俎前而几杖後。未嘗不詩。是談也。

送余廷心翰林應奉

楓葉蕭蕭江已秋。吳船三日住揚州。靛花深染青綾被。雲葉新裁紫綺裘。征驛馬嘶風滿樹。別筵人散月當樓。明年春雁將書去。人在蓬瀛第幾洲。

詩藪全篇整麗。首尾勻和。

題宋徽宗白頭翁圖

梔子紅時人正愁。故宮衰草不勝秋。西風吹落青城月。啼得山禽也白頭。筆精。宋徽宗繪畫題咏者多含譏刺。元成廷珪題白頭翁圖云云。

陸仁

仁字良貴。河南人。寓居崑山。有乾乾居士集。

菽園雜記。西湖竹枝詞。南北名士屬和者。凡一百二十二。吳郡士二十六人。而崑山在列者。一十一人。其間最有名。時稱郭陸秦袁。謂義仲。良貴。文仲。子英也。陸本崑山太倉人。其稱河南。蓋姓氏郡望耳。

天馬歌

於穆世祖肇王蹟。受天之慶大命集。神寓鴻圖大無及。功烈皞皞共開闢。四方上下沛流澤。列聖相承續。丕績哲王嗣位建皇極。大臣弼輔尙禹稷。禮樂制度靡有隙。六府孔修萬姓懌。天子聖德於昭共。念承皇祖心弗宅。日月同明天地廓。絕域窮陲歸版籍。萬國貢獻歲靡息。琛瑤瑰異陋金錫。豈須征討費兵革。文

懷遠人盡臣服。至正壬午秋之日。天馬西來佛郎國。佛郎之國遼西域。流沙瀰漫七海隔。浪波橫天馬橫涉。馬其猶龍弗顛踣。東逾月窟過回紇。陸地不毛千里赤。太行雪積滑如石。電激雷奔走。虻。四年去國抵京邑。俯首闕廷拜匍匐。帝見遠臣重怵惕。慰勞以酒賜以帛。遠臣牽馬赤墀立。金繡絡頭朱汗滴。房星下垂光五色。肉駿巍巍橫虎脊。崇尺者六修丈一。黑色如雲隄兩白。天閑騏驎俱駿骨。天馬來時皆辟易。躡驥屈乘未足惜。大宛渥洼斯與敵。穆王八駿思游歷。漢武窮兵不多得。天馬自來徵有德。史臣圖頌永無斃。再拜歌詩思彷彿。願帝愛賢如愛物。更詔山林訪遺逸。□□治化齊堯日。帝業永固保貞吉。天子萬壽天降福。

西湖竹枝集。詩學有祖法。清俊奇偉。如佛郎國進天馬頌。水仙廟迎送神辭。渡黃河望神京諸篇。縉紳先生莫不稱道之。

### 高明

明字則誠。永嘉平陽人。至正五年中第。授處州錄事。辟丞相掾。入明不仕。有柔克齋集。

和趙承旨題岳王墓韻

莫向中原歎黍離。英雄生死係安危。內廷不下班師詔。朔漠全歸大將旗。父子一門甘仗節。山河萬里竟分支。孤臣尚有埋身地。二帝游魂更可悲。

輟耕錄。讀此詩而不墮淚者幾希。

西湖游覽志。岳墳詩。趙子昂支韻難和。徐孟岳和云云。高則誠云云。

題青山白雲圖

昨夜山中宿雨晴。白雲綠樹最分明。茅堂早起無他事。去看谿南新水生。

自跋此余往日在越中錄寄倪君仲權之詩。今十餘年矣。意其不投之苦海。則亦當供醬蒙矣。仲權乃裝潢爲卷帙。列之於諸名勝間。矧當時事轆轤。世方以斯文束高閣。而仲權於朋友之片言隻字。亦無遺棄。亦可見其好尚之清。交道之厚。而不爲世變所移者也。惜也。予之學問名位。視往日不少加進。徒負故人期待之意耳。展卷一覽。慨歎不已。因書於左方。以自警云。永嘉高明。

句

吳門亂後逢梅福。遼海來時識管寧。

薄石齋詩集觀敦交集冊子自注。元季明初。上虞魏壽延仲遠。輯其三十年所友人酬贈之詩也。凡七十六首。鄭彝乙巳句。亂離時世全高潔。淳朴山川似古初。王璫至正廿五年句也。應清曠風塵外。誰道邊城尙繹騷。乙巳卽廿五年。他如凡涉憂亂者。當在辛卯。趙俶和入邑感懷云。閉戶十年方入城。當在庚子後。至高明云云。當在廿七年丁未後。是年明祖破平江。方國珍降浙。東西甫寧靜也。

謝應芳

應芳字子蘭。武進人。至正初。舉爲三衢書院山長。入明不仕。有龜巢稿。

龜巢稿。余詮序。先生之門人王著集先生之詩。鈐諸梓。先生摘其詩之什一與之。凡若干卷。名龜



巢摘稿

明史隱白鶴溪上。構小室。顏曰龜巢。因以爲號。

過吳江三高祠

三高祠前秋水波。客來弔古悲且歌。季鷹魯望桑梓敬。蠶也籩豆理則那。生爲越人身相越。百計謀吳吳乃滅。眞憂烏喙將無情。兔死狗烹肝腦裂。飄然攜手湖海游。捧心人與同扁舟。越人誇功鑄金像。於吳孰曰非仇讎。行裝重寶久彌厚。清高之風絕何有。奉嘗堪笑木腸兒。忍睹荒臺麋鹿走。江風肅肅楓葉寒。扣舷折我青琅玕。靈胥怒挾海潮起。般若雷鳴過雪灘。

南濠詩話三高祠在吳江長橋南中祀越上將軍范蠡晉大司馬東曹掾張翰唐贈右補闕陸龜蒙毗陵謝應芳嘗上書行省欲去范蠡像會世變弗果

嚴將軍戰馬歌并序

至正乙未春常多盜省府調兵捕之浙東宣慰司元帥嚴公來總軍事未幾無錫平移軍武進一日擣本富莊賊巢軍中失二馬明日賊乘之抗官兵烈塘上二馬聞金鼓來奔賊控勒不能止遂墮地馬立踈殺之官兵大捷故烈塘之民咸神其事俾余作歌以美之

往聞齊軍夜路迷老馬前導人追隨又聞的盧躍檀前漢業復立西南陲古來良驥稱有德未有驍騰能殺賊將軍兩馬馱賊來雲霧四起生風雷紅綃帕首爾何物霜蹄一踏成飛埃軍前認主鳴且舞驚倒熊羆與狐虎羣兇膽落敢口追官軍凱還槌大鼓馬兮馬兮誠有功須知感物由元戎將軍接迹武惠功煌

煌史冊書勳庸。爾馬名垂無窮。

摘稿序云。至正乙未春。浙東宣慰司元帥嚴公某。統兵捕寇。過浙西。秋八月。兵駐烈塘。一日。遣兵擄禾富莊賊巢。失一騎士。既而賊乘馬出拒。其馬望官軍來奔。賊墜地。馬隄殺之。賊衆驚潰。官軍大捷。以馬詣帳前白事。時余適在公座中。聞而喜之。故有是作。

摘稿詩云。將軍武惠之嫡孫。帳前甲騎多如雲。一驪偶爾墮賊窟。背馱賊渠來策勳。沫流兩吻噴白雪。光燦雙瞳夾經月。雷奔電激煙霧隨。望我旌旗馳踏賊。渠方命墮鐵蒺藜。驪口吮之成粉齏。賊曹瓦解爭納款。我軍凱歌歸馬嘶。古來良驥稱有德。未有驍騰能殺賊。呂家赤兔項家騅。骨朽猶當有慙色。將軍報國秉精忠。安知馬亦肝膽同。他年太史作佳傳。宜亦牽連書乃功。

宜山謠并序

廣東南丹諸州。民獠雜居。素號難治。洪武初。朝命設官置司安撫之。山東尹明善實在僚選。凡所司事。知無不爲。爲無不達。蒞官再期。多善政。後四年。有客自廣西來者。傳其事甚詳。余乃摘其大者。作宜山謠七篇。

苗獠地連交趾。咸籍爲民。且爲除其凶號。人悅之。作椎髻舞。

椎髻舞。擊銅鼓。淺蠻生蠻皆安堵。賣刀買鉏犁。啣恩人鳥語。獷俗馴。惡俗去。豈弟君子吾父母。

沿邊舊置七十五屯。獠爲長。每羣聚爲諸州害。今罷之。民乃安。作除虎窟。

除虎窟。虎皆散亡。龍睡穴。湖南海北。廣東西千里。如今無白骨。無白骨。人何憂。每每舊屯田。年年稻花秋。

我所思兮。龍江水流。

兵後游飢。發官廩。活宜山數萬口。民德之。作枯桑。

枯桑枯桑。徒爲我薪。煮石弗糜。均以食人。廩發于官。我命乃續。誰其主之。伊人如玉。伊人如玉。孚及豚魚。詔我婦子。償粟勿渝。厥粟固償。厥德靡忘。我懷伊人。于羹于牆。

覃國大章。仲海等。世爲土豪。與溪蠻洞獠相表裏。反側不一。公以計擒殺之。民大快。作霹靂斧。霹靂斧。行天誅。百靈奔走。羣醜除。磔梟獍。醜獍。招徠角端。舞騶虞。日月兩山明。畏境成康衢。

宜山莫天護。虎踞一方。公言之方伯。徙和州。民樂之。作坎井蛙。

坎井蛙兮。渤澥偷生。蝦蜆門。怒腹氣何在。長魚跋浪。欲吞舟。竟作任公雪花鱗。蛙乎幸偷生。有愧輸芒蟹。前度放蛙人。今日恩如海。

獠蠻負固。稅久不供。而良農病于重斂。今均之。視前賦減什五六。恩不能忘。作生子以尹名。

生子以尹名。有田須力耕。昔憂公租重。今喜公租輕。窮閭杼軸具。當路鈞衡平。焦冥覆盆下。覩此白日明。革命之初。公以安邊事。屢白相府。民懷之。作鞍馬勞。

鞍馬勞。肉消脾。廣西一去二千里。借箸籌邊。丞相喜。兩年單騎八往還。青草黃茅瘴煙裏。鞍馬勞。有如彼。不負公。不掠美。一寸忠丹報天子。龜巢稿。

吳師尹

師尹。字萃樂。永新人。至正八年登第。官吉州永豐縣丞。

宋丞相信國公上巳詩

匡山雲寒海舟覆。六載孤臣老燕獄。東風杜宇三月三。五雲望斷春無綠。墨花煌煌五十六。寫出江南愁。萬斛當時下筆眼如虎。日落天低鬼神哭。揚帆昔走儀真船。手持鰲柱擎南天。間關嶺海血灑檄。回首家國隨飛煙。六宮粉黛黃埃裏。漢火無煙吹不起。全軀肯效褚淵生。嚼舌甘爲呆卿死。薊門碧草春悽悽。爲官不換西山薇。哀吟一曲肝腸裂。勁氣萬丈蛟龍飛。當年恨殺葛嶺賊。恨不刳心飲其血。堂堂忠義行宇宙。白日青天照遺墨。再拜酬公金屈卮。有酒不讀蘭亭詩。

右吾鄉先生吳公所作。所以景仰丞相極至。而又兼得其儀容髣髴者也。少嘗喜誦之。丞相嘗以弟璧之子爲嗣。其後元末。仕爲海北道廉訪副使。卒葬鬱林州。子孫因家焉。余先高祖與丞相兄弟同時。書札往來。存者甚多。今來鬱林。見良錫廉訪之子也。乃寫詩以歸之。吉水解縉書。

方子京

子京字口口分水人。

鑑湖風月

賀仙歸去隱滄浪。萬頃晴波一鏡光。龍瑞尙存古時跡。鴻禧猶帶晉餘芳。兩堤楊柳三更影。千樹芙蓉五月涼。後數百年無問處。雲山煙水共蒼茫。

浙江通志。至正十一年應薦起試。以鑑湖風月詩。時試者百餘人。惟子京擢居前列。除嘉興路教授。致仕歸。

陳高

高字子上。平陽人。登至正十四年進士第。授錄事。別號不繫舟漁者。

種槿花

炎方有種樹衣被代蠶桑。舍西得閒園。種之漫成行。苗生初夏時。料理晨夕忙。揮鋤向烈日。灑汗成流漿。培根澆灌頻。高者三尺強。鮮鮮綠葉茂。燦燦金英黃。結實吐秋繭。皎潔如雪霜。及時以收斂。采之動盈筐。緝治人機杼。裁剪爲衣裳。禦寒類挾纊。老稚免淒涼。豪家植花卉。紛紛被垣牆。於世竟何補。爭先翫芬芳。棄取何相異。感物增惋傷。

木綿譜。宋末木綿之利。尙在閩中。而江南無此種也。元人陳高有詩云云。高。元末人。而隙地初學種之。則其來未久可知。

周志遠

志遠字□□。吉水人。以危素薦授太子說書。

自題其像

十年塵土變形容。惟有丹心日月同。北海子卿羝不乳。未應已在畫圖中。

江西通志。周志遠生於元。仕於元。然其心若有不自得者。嘗自贊其像云云。

鄭玉

玉字子美。徽州歙縣人。至正十四年。除翰林待制。辭疾不起。明兵至。將要致之。自經死。學者稱師。

山先生有師山集

師山書樓成唐長孺先生賦詩見寄次韻

居山日夕見山容。環堵蕭然一畝宮。我喜煙雲來几上。人看樓閣出空中。夜深月色偏明朗。曉起嵐光更鬱蔥。若比羊裘軒上景。臨江惟欠一絲風。

師山先生文集。余以才疏學陋。一無所用於世。退而躬耕壟畝。將以自養。間有朋游。相從講學。乃築室師山之上。以爲肄習之所。

陳謙

謙字子平。吳郡人。

勉學詩錄一

黃河西北來。云是崑崙邱。經行非一山。回薄半九州。上有不測源。下有無盡流。萬化同此機。不知幾春秋。分明天地心。不爲淺狹謀。癡人用小計。顛倒若無求。安得申韓氏。化爲古伊周。

菽園雜記。遜志齋集三十卷。其二十八卷內。勉學詩二十四章。本蘇士陳謙子平所作。誤入方集耳。子平。元末人。張士誠兵至。吳有突入其室者。脇其兄訓使拜。不屈。刃其胸。子平以身翼蔽。并遇害。平生著述甚富。兵後散亡。獨所著易解詁二卷。及古今詩數十篇。傳於世。正統間。吾崑山所刻。麓堂大訓。攷其詩。予幼嘗見之。京師士人徐本以道。亦嘗刻其詩印行。後有國初韓奕公望跋詒。

韓徐皆蘇人。  
案明詩綜方孝孺下登此一首。

